



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

EX BIBLIOTHECIS GUDBRANDRI  
VIGFUSSON et FRIDERICI YORK POWELL  
olim alumni, partim ab hoc legatis, partim  
emptis, a. MCMIV.

8 A<sup>2</sup> 12.22 ✓











# HERVARAR SAGA

OK

## HEIDREKS KONUNGS,

besørget af N. M. PETERSEN, oversat af G. THORARENSEN.

udgivet

af

**det nordiske Literatur-Samfund.**

---

KJØBENHAVN.

TRYKT I BRØDRENE BERLINGS BOGTRYKKERI.

1847.





## Forord.

---

Nærværende 'saga findes i flere, såvel i udtryk som fortællingsmåde temmelig afvigende, håndskrifter; ved de forrige udgaver er den udførligste behandling aftrykt; her finder det omvendte sted. Til grund er lagt membranen Arnæ-Magn. nr. 544. 4to (som også er aftrykt i Fornaldars. 1ste d.), så vidt som den gik, og dernæst membranen nr. 2845 på det store kgl. bibl.; men også den har huller såvel i begyndelsen og midten, som i slutningen; ved siden af den er derfor benyttet det papirshåndskrift, som kommer den nærmest, Arnæ-Magn. nr. 192. fol., og derefter andre papirshåndskrifter. Der er således gjort et forsøg på, først at benytte de ældste, hvilke tillige sædvanlig ere de korteste, og derefter de senere håndskrifter. Begge dele var her nødvendigt, for at frembringe en sammenhængende fortælling. Enkelte ord og tillæg, som ere tagne af senere håndskrifter, ere ikke videre betegnede; kun ved nogle ganske få fandtes det for indholdets skyld nødvendigt at sætte dem i klammer; for at vise tonen i de udførligere behandlinger ere nogle større varianter tilføjede bag teksten som tillæg; åbenbare fejl ere rettede. En sådan behandlingsmåde kunde måske synes hel vilkårlig; men dens nødvendighed ligger i håndskrifternes beskaffenhed; thi alle tilhobe ere kun, mere eller mindre heldige, forsøg på at gengive en fortælling, der oprindelig, på begyndelsen og slutningen nær, udgjorde en samling af episke smådigte.

Som eksempler på behandlingsmåden anføres: Striden på Samse er i membranen 544 så kort behandlet, at den anden membran måtte lægges til grund, og tillæg tilføjes af

de endnu udførligere håndskrifter; med 6te kap. begynder Ærimod atter membranen 544. Det første stykke af 10de kap. er taget af membranen 2845, fordi membranen 544 har denne beretning på to steder, og således gentager sig selv; men derefter indtræder igen membranen 544. Til gåderne er her også benyttet Arnæ-Magn. nr. 281. 4to, og til slutningen af sagaen nr. 21. 4to blandt de Raskiske håndskrifter i tillæg til Arnæ-Magn. Begyndelsen af 13de kap. er taget af Arnæ-Magn. nr. 345. 4to, fordi nr. 192 fol. på dette sted har en kortere beretning, hvori Hárvaðafjöll ej nævnes, skøndt de siden forekomme i verset, et bevis på, at fremstillingen her var mangelfuld. o. s. fr.

På nogle steder, f. ex. i gåden om gløderne, er det lykkets at frembringe en mening, hvor der forhen ingen var; andre ere endnu tvivlsomme. Det ubekendte ord: basmir (s. 56. l. 11.) findes ganske tydelig i to håndskrifter (Arnæ-Magn. nr. 193. fol. og nr. 21. 4to blandt de Raskiske håndskrifter) samt i Verelii udgave; andre håndskrifter have åbent rum for dette ord, og have forvandlet det næste oskertar til osker tvær; derpå have atter andre ladet det manglende ord uanset, og således er den hidtil brugelige læsemåde: óskir tvær fremkommen; ved fortsat forskning ville muligen flere mindre tydelige udtryk på lignende måde lade sig oplyse.

Sprogformen har man, da disse udgaver må have til hensigt at tilvejebringe enhed i sprogets ydre, søgt at nærme så vidt muligt til den, som forhen er anvendt i udgaven af Hrafnkelssaga; membranen 544 skriver overalt sun (for son), og anvender ganske regelmæssig œ; lidformen på -sk (for st, i håndskr. z eller s), som er den oprindelige form og endnu findes i håndskrifter fra det trettende århundredes midte, må derved anses for henhørende til den ægte gamle sprogform. Fuldkommen enhed vil næppe endnu for øjeblikket være at opnå, men det er at håbe, at flere forsøg, hvorved tvivlsomme former efterhånden komme til deres ret, endelig ville fremkalde den.

---

# **HERVARAR SAGA**

**OK**

# **HEIÐREKS KONUNGS,**

**besøget af**

**N. M. Petersen.**



Hér hefr upp sögu Heiðreks konungs ins vitra.

1. Svá er sagt, at í fyrndinni var kallat Jötunheimar<sup>1</sup> norðr í Finnmörk, en Ýmisland fyr sunnan ok millim Hálogalands; þar byggðu þá risar víða, en sumir váru hálf-risar; var þá mikit sambland þjóðanna, þvíat risar fengu kvenna af Ýmislandi.

Guðmundr hét konungr í Jötunheimum; hann var blót-maðr mikill; boer hans hét á Grund, en héraðit á Glasis-völlum<sup>2</sup>; hann var vitr ok ríkr; hann ok menn hans lifðu marga mannsaldra, ok því trúa heiðnir menn, at í hans ríki sè Údáinsakr, en hverr er þar kemr hverfr af sótt ok elli, ok má eigi deyja. Eptir dauða Guðmundar blótuðu menn hann, ok kölluðu hann goð sitt. Hans sun hét Höfundr; hann var bæði forspár ok spakr at viti, ok var dómandi allra mála yfir þeim ríkjum, er þar váru í nánd; hann dæmdi aldri rangan dóm, ok engi þorði, nè þurfti, at rjúfa hans dóma.

Maðr hét Hergrímr, hann var risi ok bergbúi; hann nam af Ýmislandi Ámu Ýmisdóttur<sup>3</sup> ok fékk síðan. Þeirra sún var Hergrímr hálftröll; hann var stundum með berg-risum, en stundum með mönnum; hann hafði afl sem jötnar; hann var allfjölkunnugr ok berserkr mikill; hann nam af

---

1) Álfheimar. — 2) e. h. Glasisvellir. — 3) Rettet for: Ámu dóttur Ýmisdóttur.

Jötunheimum Ögn Álfasprengr, ok fékk síðan. Grímr<sup>1</sup> hèt sun þeirra. Hana hafði fest Starkaðr Áludrengr, [hann var kominn af þussum; Stórvirk<sup>2</sup> hèt faðir hans.] Hann hafði átta hendr. Hann var farinn norðr um Álufossa<sup>3</sup>, ok var hón þá brott tekin; en er hann kom heim, þá drap hann Hergrím á hólmgöngu. [Þeir börðusk við inn efsta foss at Eyði.] Ögn lagði sik sverði í gegnum, ok vildi ekki giptask Starkaði.

[Álfr hèt konungr, er ræð fyrir Álfheimum; Álfhildr hèt dóttir hans. Álfheimar hētu þá á milli Gautelfar ok Raumelfar. Eitt haust var gört disablót mikit hjá Álf konungi, ok gekk Álfhildr at blótinu; hón var hverri konu fegri, ok allt fólk í Álfheimum var fríðara at sjá, enn annat fólk því samtíða; en um nóttina, er hón rauð hürginn, nam Starkaðr Áludrengr Álfhildi á burt, ok hafði hana heim með sér. Álfr konungr hèt þá á Þór, at leita eptir Álfhildi, en síðan drap Þórr Starkað<sup>4</sup>]. Fór þá Álfhildr til frænda sinna, ok var Grímr með henni, þar til er hann fór í hernað, ok varð inn mesti hermaðr. Hann fékk Bauggerðar, dóttur [Álfhildar ok] Starkaðs Áludrengs. Hann fékk sér bústað í ey þeirri á Hálogalandi, er Bólm heitir; hann var kallaðr Eygrímr Bólmr. Sun þeirra Bauggerðar hèt Arngrímr berserk, er síðan bjó í Ból, ok var inn ágætasti maðr.

2. Konungr hèt Sigrlami, svá er sagt, at hann væri sun Óðins. [Hánum fékk Óðinn þat ríki, sem nú er kallat Garðaríki. Sigrlami átti Heiði, dóttur Gylfa konungs; þau áttu sun saman, sá hèt Svafrlami. Sigrlami féll í orrustu, er hann barðisk við Þjassa jötun. Nú sem Svafrlami frétti

<sup>1</sup>) Gunnarr. — <sup>2</sup>) Stórkviðr.

<sup>3</sup>) *Utlæseligt i membranen: afskriften har Álupolla, der vistnok skal være Álufossa (Ölfossa) som findes foran i papirshåndskrifterne.*

<sup>4</sup>) *Membr. har kun: Eptir þat nam Starkaðr Álfhildi, dóttur Álfs konungs úr Álfheimum, en Þórr drap Starkað.*

fall föður síns, tók hann undir sik ríki þat allt til forráða, sem faðir hans hafði átt; hann varð ríkr maðr.]<sup>1</sup>

Ok einn dag er konungr reið á veiðar, ok hann varð einn sinna manna, — hann sá einn stein mikinn við sólarsetr, ok þar hjá dverga tvá. Konungr vígði þá utan steins með málasaxi<sup>2</sup>; þeir beiddu fjörlausnar. Konungr mælti: „hvat heiti þer?“ Annarr nefadisk Dvalinn<sup>3</sup>, en annarr Dulinn<sup>4</sup>. Konungr mælti: „af því at þit erut allra dverga hagastir, þá skulu þit göra mēr sverð, sem bezt kunni þit; hjöltin ok meðalkaflinn skal vera af gulli; þat skal svá bíta járn, sem klæði, ok aldri ryðr á festask; því skal fylgja sigr í orrustum ok einvígjum, hverjum er berr.“ Þessu játa þeir. Konungr ríðr heim. En er stefnudagr kemr, ríðr konungr til steinsins; eru þá dvergarnir úti, ok fengu konungi sverðit, ok var it frídasta. En er Dvalinn stóð í steinsdurum, þá mælti hann: „sverð þitt, Svafrlami! verðr manns bani hvert sinn er brugðit er, ok með því skulu unnin vera þrjú níðingsverk hin mestu; þat skal ok verða þinn bani.“ Þá hjó konungr sverðinu til dverganna, hlupu þeir í steininn; höggit kom ok í steininn, ok fal báða eggteina, því at dyrrnar lukusk aptr á steininum. Konungr kallaði sverðit Tyrfing, ok bar hann þat jafnan síðan í orrustum ok einvígjum, ok hafði jafnan sigr. [Hann felldi Þjassa jötun í einvígi, föðurbana sinn, en tók dóttur hans, þá er Fríðr hét, ok átti hana síðan.] Konungr átti dóttur, er hét Eyfura<sup>5</sup>; hón var kvenna vænst ok vitrust.

3. Arngrímr var þá í víking í Austrveg um Bjarmaland; hann herjaði í ríki Sigrlama konungs, ok átti orrustu við hann, ok áttusk þeir vápnaskipti við, ok hjó konungr til

1) *Membr. kortere*: hans sun hét Svafrlami, hann tók ríki eftir föður sinn: hann var inn mesti hermaðr.

2) málajárni. — 3) Dórlinn (Dýrlinn).

4) Dvalinn. — 5) Eyvóra.

hans. Arngrímr kom fyrri sík skildinum, (hann hafði aftaksskjöld mikinn, settan stórum járnsklám), ok tók af skjaldar-spordinn, ok nam sverðit í jörðu staðar. Þá hjó Arngrímr af konungi höndina, ok fèll þá niðr Tyrfingr. Arngrímr þreif sverðit Tyrfing, ok hjó með konunginn fyrst, ok síðan marga aðra. Tók hann þar herfang mikit, ok flutti brott með sér Eyfuru konungsdóttur, ok flutti hann hana heim til húss síns í Bólum<sup>1</sup>. Hann átti með henni tólf sonu: Angantýrr var elztr, þá Hervarðr, þá Hjörvarðr, Sæmingr ok Hrani, Brami, Barri, Reifnir, Tindr ok Búi, ok tveir Haddingjar<sup>2</sup>, ok unnu þeir báðir eins verk, því at þeir vátu tvíburar ok yngstir; en Angantýrr vann tveggja verk, hann var ok höfði hærri enn aðrir menn. Allir vátu þeir berserkir ok umfram aðra menn at afli ok áræði. En þó at þeir færi í hernað, þá vátu þeir aldri fleiri á skipi enn þeir tólf bræðr. Þeir fóru víða um lönd at herja, ok vátu mjök sigrsælir, ok urðu inir frægstu. Faðir þeirra hafði tekit í hernaði þau ágætustu vápn, þar er hann hafði barizk. Angantýrr hafði Tyrfing, en Sæmingr Mistiltein [þann sótti Þráinn síðan í haug hans], Hervarðr Hrotta<sup>3</sup>, ok allir höfðu þeir ágæt hölmgöngusverð. En þat var síðvenja þeirra, þá er þeir vátu með sínum mönnum einum, at þá er þeir fundu at berserksgangr kom at þeim, fóru þeir á land upp, ok brutusk við skóga eða stóra steina; því at þeim hafði þat at váða orðit, at þeir höfðu drepit menn sína ok hroðit skip sín, þá er berserksgangr fór at þeim; stórar sagur<sup>4</sup>) fóru af þeim ok mikil fræð.

Sú náttúra fylgði Tyrfingi, at hvert sinn er hann var úr slíðrum dreginn, þá lýsti af sem af sólargeisla, þó at

<sup>1</sup>) Arngrímr fór með konu sinni Eyfuru norðr til ættleifðar sinnar, ok nam staðar í ey þeirri er Hólmr hét.

<sup>2</sup>) Haddingjar. — <sup>3</sup>) *Rettel for brota*. — <sup>4</sup>) sögur.



myrkt væri, ok hann skyldi slíðra með vörmu mannsblóði; ekki lifði þat ok til annars dags, er blæddi af hánum; hann er mjök frægr í öllum fornsögum <sup>1</sup>.

4. Einn jólaaptan í Bólum þá strengði Hjörvarðr <sup>2</sup> heit at bragarfulli, sem siðvenja var til, at hann skyldi eiga dóttur Yngva konungs at Uppsölum <sup>3</sup>, Ingibjörgu, þá mey er fegrst var ok vitrust á danska tungu, eða falla at öðrum kosti, ok eiga enga konu aðra. Eigi er sagt af fleirum heitstrengingum þeirra.

Þat sumar fóru þeir bræðr til Uppsala í Svíaríki, ok gengu inn í höllina, ok segir Hjörvarðr <sup>4</sup> hánum heitstrenging sína, ok þat með, at hann vill fá dóttur hans; allir hlýddu er inni váru. Angantýrr <sup>5</sup> bað konung segja skjótt hvert þeirra erindi skyldi vera. Í því bili stó fram yfir borðit Hjálmarr inn hugumstóri, ok mælti til konungs: „minnisk, herra, hversu mikla sæmd ek hefir þér unnit, síðan ek kom í yðart ríki, ok í mörgum lífsháska fyrir yðr verit; ok fyri mína þjónustu bið ek, at þér giptit mér dóttur yðra; þykkisk ek ok makligri mína bæn at þiggja enn berserkir þessir, er hverjum manni göra illt.” Konungr hugsar fyri sér, ok þykkir þetta mikill vandi, hversu þessu skal svara, svá at minnst vandræði mætti af standa, ok svarar um síðir: „þat vil ek, at Ingibjörg kjósi sér sjálf mann, hvern hún vill hafa.” Hón segir: „ef þér villt mik manni gipta, þá vil ek þann eiga, er mér er áðr kunnigr at góðum hlutum, en eigi þann, er ek hefir ekki af annat enn sögur einar, ok allar illar.” Angantýrr <sup>5</sup> mælti: „ekki vil ek hnippask orðum við þik, því at ek sé, at þú elskar Hjálmarr; en þú. Hjálm-

1) Dette stykke står senere i membr.

2) Indsat efter den anden membran for Angantýr.

3) Ingjalds Sviakonungs.

4) Navnet er indsat efter den anden membran.

5) Hjörvarðr.

arr, kom suðr á Sámsey til hólmgöngu við mik, ella ver hvers manns níðingr, ef þú kemr eigi at miðju sumri at ári.” Hjálmarr kvað sik ekki dvelja at berjask. Fóru Arngríms synir heim til föður síns, ok sögðu hán um svá gört; hann kvazk ekki fyrr hafa óttask um þá enn nú; „því at hvergi veit ek Hjálmars maka vera at hreysti ok harðfengi, fylgir hán um ok einnig sá kappi, er hán um gengr næst til afis ok árædis.” Lætta þeir nú svá sínu tali.

Váru þeir heima um vetrinn; ok um várit bjuggusk þeir heiman, ok fóru fyrst til Bjartmars jarls (jarl sá ræð fyrir Aldeigjuborg), ok tóku þeir þar veizlu. Ok um kveldit beiddisk Angantýrr, at jarl gipti hán um dóttur sína<sup>1</sup>; ok þetta sem annat var gört eptir þeirra vilja, at brúðlaup var gört; ok síðan bjuggusk Arngríms synir brott. Ok þá nótt áðr þeir fara dreymdi Angantýr draum, ok sagði jarli: „ek þóttisk vera staddr í Sámsey ok bræðr mínir; þar fundu vèr marga fúgla, ok drápum alla, er vèr sáum; ok síðan þótti mèr, sem þeir snèri annan veg á eyna, ok flugu móti oss ernir tveir, ok gekk ek móti öðrum, ok áttumsk vèr hart viðrskipti saman; ok um síðir settumsk vèr niðr, ok várum til enkis færir; en annarr arinn átti við ellifu bræðr mína, ok vann alla þá.” Jarl segir, at þann draum þurfti ekki at ráða, „þar var þèr sýnt fall ríkra manna, ok ætla ek stappi nær yðr bræðrum.” Þeir kváðusk því ei kvíða mundu. Jarlinn mælti: „allir fara, þá er feigðin kallar;” ok lyktask síðan tal með þeim.

En er þeir bræðr koma heim, búask þeir til hólmstefnu, ok leiðir faðir þeirra þá til skips, ok gaf þá sverðit Tyrfring Angantýr: „hygg ek,” sagði hann, „nú muni þörf vera góðra vápna, því þèr berisk við þá fræknustu fullhuga;” hann biðr þá nú vel fara; eptir þat skiljask þeir.

1) Tillæg: er Svafa hét: men í Hervör's sang í 7de kap. er hendes Narn Tóta.

Ok er þeir bræðr koma til Sámseyjar, sjá þeir hvar  
 vau skip liggja í höfn þeirri, er Unavágr<sup>1</sup> heitir; þau skip  
 hétu askar, ok hundrað manns á hverju hinna vöskustu  
 drengja. Þeir þóttusk vita, at Hjálmar mundi þessi skip  
 eiga ok Oddr hinn víðförli, er kallaðr var Örvaroddr. Ok  
 þá brugðu Arngríms synir sverðum, ok bitu í skjaldatrendr,  
 ok kom á þá berserksgangr; þeir gengu þá sex út á hvern  
 askinn; en þar vóru svá góðir drengir innan borða, at allir  
 tóku sín vápn, ok engi flýði ór sínu rúmi, ok engi mælti  
 æðruorð. En berserkirnir gengu með öðru borði fram, en  
 öðru aptr, ok drápu þá alla; síðan gengu þeir á land upp  
 grenjandi. Þá mælti Hjörvarðr: „elliglöp stríða nú á Arn-  
 grím föður várn, er hann sagði oss, at þeir Hjálmar ok  
 Oddr væri hinir hraustustu kappar, en nú sá ek öngvan duga  
 öðrum framar.” Angantýrr svarar: „sökumsk ei um þat,  
 þó vèr fyndim ei vára maka, má ok vera<sup>2</sup>, at þeir Oddr ok  
 Hjálmar sè enn eigi dauðir”. Hjálmar ok Oddr höfðu  
 gengit upp á eyna at vita, ef berserkirnir væri komnir; ok  
 er þeir gengu ór skóginum til skipa sinna, þá gengu ber-  
 serkir út af skipum þeirra með blóðgum vápnum ok brugðnum  
 sverðum; ok var þá genginn af þeim berserksgangrinn, en  
 þá verða þeir máttminni enn þess á milli sem eptir nökkurs  
 kyns sóttir. Þá kvað Oddr:

Þá var mèr ótti  
 einu sinni,  
 er þeir grenjandi  
 gengu af öskum,  
 ok emjandi  
 á ey stigu,  
 tírarlausir,  
 váru tólf saman.

<sup>1</sup>) eller Munarvagr. Efter andre to forskellige hærne. — <sup>2</sup>) rettet for skè.

Þá mælti Hjálmar til Odds: „sér þú nú, at fallnir eru menn okkrir allir, ok sýnisk mér nú líkast, at vèr munum allir Óðin gista í kveld í Valhöllu;” ok þat eitt segja menn at Hjálmar hafi mælt æðruorð. Oddr segir: „en ek nenni eigi at gista Óðin í kveld, ok skulu þessir allir dauðir, berserkirnir, áðr kveld sè, en vit tveir lifa. Þetta viðrmæli þeirra sanna þessar vísur, er Hjálmar kvað:

Fara halir hraustir  
af herskipum,  
tólf menn saman  
tíralausir;  
vit munum í aptan  
Óðin gista  
tveir berserkir  
en þeir tólf lifa.

Oddr svarar:

Því mun ek orði  
andsvör veita:  
þeir munu í aptan  
Óðin gista  
tólf berserkir,  
en vit tveir lifa.

Berserkirnir sóttu nú á móti þeim með brugðnum sverðum, váru alblóðgir, ok einn var höfði hærri enn aðrir. Þeir Hjálmar sjá, at Angantýrr hefir Tyrfing í hendinni, því at lýsti af hánum sem sólargeisla. Hjálmar mælti: „hvárt viltu heldr eiga við Angantýr einn eðr við bræðr hans ellifu?” Oddr svarar: „ek vil berjask við Angantýr, hann mun gefa stór högg með Tyrfingi, en ek trúí betr skyrtu minni, enn brynju þinni, til hlífðar.” Hjálmar

mælti: „hvar komu vit þar til orrustu, at þú gengir fram fyrir mik; því viltu berjask við Angantýr, at þér þykkir þat meira þrekvirki: nú em ek höfuðsmaðr þessarrar hólmgöngu; hæt ek öðru konungsdóttur heima í Svíþjóðu, enn láta þik eðr annan ganga í þetta einvígi fyri mik, ok skal ek berjask við Angantýr.” Ok brá hann þá sverðinu, ok gekk fram í móti Angantýr; ok vísaði hvárr öðrum til Valhallar. Snúask þeir í móti Hjálmarr ok Angantýrr ok láta skamt stórra huggva á milli.

Oddr kallar á berserkina, ok kvað:

Einn skal við einn  
eiga, néma sè deigr<sup>1</sup>,  
hvatra drengja,  
eðr hugr bili.

Þá gekk fram Hjörvarðr, ok áttusk þeir Oddr við hart vápnaskipti, en silkiskyrta Odds var svá traust, at ekki vápn festi á, en hann hafði sverð svá gott, at svá beit brynju sem klæði; ok fá högg hafði hann veitt Hjörvarði, áðr hann féll dauðr. Þá gekk til Hervarðr, ok fór sömu leið; þá Hrani, þá hverr at öðrum; en Oddr veitti þeim svá harða atsókn, at alla felldi hann þá ellifu bræðr. En frá leik þeirra Hjálmars er þat at segja, at hann fékk sextán sár, en Angantýrr féll dauðr.

Oddr gekk þar til er Hjálmarr var, ok kvað:

Hvat er þér, Hjálmarr,	hjálmr er þinn huggvinn
hefir þú lit brugðit,	ok in síða brynja <sup>2</sup> ,
þik kveð ek mæða	nú kveð ek fjörvi
margar undir;	of <sup>3</sup> farit þínu.

<sup>1</sup>) *ell.* Einu skal við einn orrustu heyja. — <sup>2</sup>) *ell.* ok á hlið brynja.

<sup>3</sup>) *rettet for* ok.

Hjálmarí kvað:

Sár hefi ek sextán,  
slitna brynju,  
svart er mër fyrir sjónum,  
sèkat ek <sup>1</sup> ganga;  
hneit mër við hjarta  
hjörri Angantýrs,  
hvass blóðrefill,  
herðr í eitri.

Ok enn kvað hann:

Áttak at fullu  
fimm tún saman,  
en ek því aldri  
unda ráði<sup>2</sup>;  
nú verð ek liggja  
lífs andvani,  
sverði sundraðr,  
í Sáms eyju.

Drekka í höllu .  
húskarlar mjöd,  
menjum <sup>3</sup> göfgir  
at míns föður<sup>4</sup>;  
mæðir marga  
munngát-fenja<sup>5</sup>,  
en mik eggja spor  
í eyju þjá.

Hvarf ek frá hvítri  
hlaðbeðs gunni<sup>6</sup>

á Agnaflit  
utanverðri;  
saga mun sannask,  
sú er hón sagði mër,  
at aptr koma  
eigi mundak.

Drag þú mër af hendi  
bringinn rauða,  
fær þú inni ungu  
Ingibjörgu!  
Sá mun henni  
þugfastr tregi,  
er ek eigi kem  
til Uppsala.

Hvarf ek frá fögrum  
fljóða söngvi,  
útrauðr gamans,  
austr við Sóta;  
fyr skundaðak,  
ok fórk í lið  
hinna sinni  
frá hollvinum.

Hrafn flýgr austan  
af hám meiði<sup>7</sup>,  
flýgr hánun eptir  
örn í sinni;  
þeim gef ek erni  
efstum bráðir,

1) *sat for seka se ek.* — 2) *ell. en ek unda þó aldri á láði.* — 3) *menn mjök.*  
4) *ell. Drekkir með jöfri jarla mengi öl glaðliga at Uppsölum.* — 5) *munngát*  
*frða.* — 6) *hlaðs beðgungi ell. hlaðbeðs gungi, membr.* — 7) *ell. af Hamarheiði.*

sá mun á blóði  
bergja mínu.

Eptir þat deyr Hjálmarr.

Oddr segir þessi tíðindi heim í Svíþjóð; en konungs dóttir má eigi lifa eptir hann, ok ræðr sèr sjálf bana. Ang-antýrr ok bræðr hans váru lagðir í haug á Sámsey með öllum vápnum sínum.

6. Nú er þar til at taka, at dóttir Bjartmars jarls fœddi meybarn, ok þótti flestum ráð, at út væri borit, ok sögðu, at eigi mundi konuskap hafa, ef föðurfrændum yrði líkt. Jarl lét ausa vatni ok upp fœða, ok kallaði Hervöru, ok sagði, at eigi var þá aldaða ætt Arngríms suna, ef hón lifði. En er hón vóx upp, þá var hón fögr; hón tamdi sik meirr við skot ok skjöld ok sverð enn við sauma ok borða; hón var mikil ok sterk, ok þegar hón mátti nökkut, gördi hón ok optar<sup>1</sup> illt enn gott; ok er henni var þat meinat, þá hljóp hón út á skóga, ok drap menn til fjár sèr. En er jarl varð þess varr, þá lét hann taka hana, ok fœra heim, ok var hón þá heima um stund.

Þat var eitt sinn, at Hervör var úti stödd því nær, er þrælur nökkurir váru, ok gördi hón þeim illt sem öðrum. Þá mælti einn þrællinn: „þú, Hervör, vilt illt eitt göra, ok illt er at þèr ván, ok því bannar jarl öllum mönnum at segja þèr þitt faderni, at hánur þykkir skömm ein, at þú vitir þat; því at inn versti þræll lagðisk með dóttur hans, ok ertu þeirra barn. Hervör varð við þessi omö afar- reið, gengr þegar fyri jarl, ok kvað:

Áka ek várri  
vegsemd hrósa,

þótt hón Fróðmars<sup>2</sup>  
fengi<sup>3</sup> hylli,

1) hvárki. — 2) Navnet er usikkert. — 3) fengia.

föður hugðumk<sup>1</sup>  
fræknan eiga,  
nú er sagðr fyrri mēr  
svínahirðir.

Jarl kvað:

Logit er margt at þær  
lítill<sup>2</sup> of frètt  
(frækin) með fyrðum  
faðir þinn taliðr;  
stendr Angantýrs<sup>3</sup>  
ausinn moldu  
salr<sup>4</sup> í Sámsey  
sunnanverðri.

Hón kvað:

Nú fýsir mik,  
fóstri, at vitja  
framgenginna  
frænda minna;  
auð mundu þeir  
eiga nógan,

þann skal ek öðlask,  
nema ek áðr förumk<sup>5</sup>.

Skal skjótliga  
um skör búa  
blæis líni,  
áðr braut fari;  
mikit býr í því,  
er á morgun skal  
skera bæði mēr  
skyrtu ok ólpu<sup>6</sup>.

Síðan mælti Hervör við  
móður sína, ok kvað:

Bú þú mik at öllu,  
sem þú hvatast kunnir,  
sannfund<sup>7</sup> kona,  
sem þú sun mundir;  
fátt eitt mun  
mēr í svefn bera<sup>8</sup>,  
fæ ek ekki hēr  
yndi<sup>9</sup> it næsta<sup>11</sup>.

7. Litlu síðar hvarf hón ein saman með karlmanns  
búnaði ok vápnum, ok fór til víkinga, ok var með þeim  
um stund, ok nefndisk Hervarðr<sup>11</sup>; ok litlu síðarr dó höfðingi  
víkinga, ok tók þá Hervarðr forræði liðsins.

1) *indsat for hugðumsk ek.* — 2) lýti. — 3) Angantýr. — 4) hæl.

5) *indsat for förumsk eller förunst.* — 6) *omsat for ólpu ok skyrtu.*

7) sannprúð. — 8) satt eitt mun mēr í svefn (ell. sinnu) bera. — 9) yndis.

10) *Isteden for alt det foregående har membranen:* Hón kemr at jarli einn dag,  
ok mælti: „brott vil ek hëðan, því at ekki fæ ek hër yndi.”

11) Hjörvarðr.



Ok eitt sinn, er þeir komu til Sámseyjar, gekk Hervarðr á land, ok vildi engi hans manna fylgja hánun; því at þeir sögðu þar engum manni duga um nætr úti at vera. Hervarðr kvað vera mikla fëván í haugunum, ok fór á land, ok gekk upp á eyna nær sólarglaðan <sup>1</sup>. Þeir lágu í Munarvági; þar hitti hón hjarðarsvein einn, ok spurði hann tíðinda; hann segir: „er þèr úkunnigt hèr í eyjunni, ok gakk heim með mèr, því at hèr dugir engum manni úti at vera eptir sólar-setr, ok vil ek skjótt heim.” Hervarðr svarar: „seg mèr, hvar Hjörvarðs haugar heita.” Sveinninn svarar: „vanfarinn ertu, er þú vilt þat forvitnask um nætr, er fárr þórir á miðjum dögum, ok brennandi eldr leikr þar yfir, þegar sól gengr undir.” Hervarðr kveðsk at vísu skyldu vitja hauganna. Fëhirðir mælti: „ek sè, at þú ert drengiligr maðr, þó at þú sèr úvittr; þá vil ek gefa þèr men mitt, ok fylg mèr heim!” Hervarðr segir: „þó at þú gefir mèr allt þat, er þú átt, fær þú mik eigi dvalit.” En er sólin settisk, görðusk dunur miklar út á eyna, ok hlupu upp hauga eldarnir; þá hræddisk fëhirðir, ok tók til fóta, ok hljóp í skóginn, sem mest mátti hann, ok sá aldri aptr. Þetta er kveðit eptir viðræðu þeirra:

Hitt hefir mær ung  
í Munarvági  
við sólarsetri  
segg at hjörðu:  
„Hverr einn saman <sup>2</sup>  
í ey kominn?  
gakktu greilliga <sup>3</sup>  
gistingar til!”

„Munkat ek ganga  
gistingar til,  
því at ek engan kann  
eyjarskeggja;  
segðu hraðliga,  
áðr hëðan líðir,  
hvar eru Hjörvarði  
haugar kenndir?”

<sup>1</sup>) í þann tíma er sól settisk.

<sup>2</sup>) hverr er ýta. — <sup>3</sup>) sýsliga.

„Spyrjattu at því,  
spakr ertu eigi,  
vinr víkinga,  
þú ert vanfarinn;  
förum frálíga,  
sem okkr fœtr toga,  
allt er úti  
ámátt firum <sup>1</sup>.”

„Men bjóðum þér  
máls at gjöldum,  
muna drengja vin  
dælt at letja.”  
„Fær engi mēr svá  
fríðar hnossir,  
fagra bauga,  
at ek fara eigi.”

„Heimskr þykki mēr,  
þá er hæðra ferr  
maðr einn saman  
myrkvar grímur;

hyrr er á sveimun,  
haugar opnask,  
brennr fold ok fen,  
förum harðara!”

„Hirðum-at fælask  
við fnoðsun <sup>2</sup> slíka,  
þótt um alla ey  
eldar brenni;  
látum ei okkr  
liðna rekka <sup>3</sup>  
skjótla skelfa,  
skulum við talask.”

Var þá fēhirdir  
fljótr til skógar  
mjök frá máli  
meyjar þessar;  
en harðsnúinn  
hugr í brjósti  
um sakar slíkar  
svellr Hervöru <sup>4</sup>.

Hón sá nú hauga-eldana ok haugbúa úti standa, ok gengr til hauganna, ok hræðisk ekki; ok óð hón eldana sem reyk <sup>5</sup>, þar til er hón kom at haugi berserkjanna. Þá kvað hón:

<sup>1</sup>) allt er víti á nátt firum ell. allt er úti á náttförum.

<sup>2</sup>) þrúsun. — <sup>3</sup>) omsat for: rekka liðna.

<sup>4</sup>) Nogen omsætning af disse strofer var nødvendig, og finder sin hjemmel såvel i den næstforegående fortælling som tildels i håndskrifterne.

<sup>5</sup>) sem myrkva þoku.

Vaki þú, Angantýrr,  
vekr þik Hervör,  
einka <sup>1</sup> dóttir  
ykkur Tófu <sup>2</sup>;  
sel þú mér ór haugi  
hvassan mæki,  
þann er Svafrlama  
slógu dvergjar.

Hervarðr ok Hjörvarðr,  
Hrani, Angantýrr,  
vekr ek yðr alla  
undir viðarrótum,  
hjálmi ok með brynju,  
hvössu sverði,  
rönd ok með reiði,  
roðnum geiri <sup>3</sup>.

Mjök erut orðnir,  
Arngríms synir,  
megir meinsamir  
at moldar auka <sup>4</sup>,  
er engi skal <sup>5</sup>  
suna Eyfuru  
við mik mæla  
í Munarvági <sup>6</sup>.

Hervarðr, Hjörvarðr,  
Hrani, Angantýrr,  
svá sè yðr öllum  
innan rifja,

sem þèr í maura  
mornit haugi <sup>7</sup>,  
nema sverð sellt mér,  
þat er sló Dvalinn,  
samir ei draugum  
dýr vápn fela.

Þá svarar Angantýrr:

Hervör dóttir,  
hví kallar svá  
full feiknstafa,  
ferr þú þèr at illu;  
æð ertu orðin  
ok örvita,  
vill hyggjandi,  
vekr menn dauða.

Grófat mik faðir <sup>8</sup>,  
nè frændr aðrir,  
þeir höfðu Tyrning  
tveir er lifðu,  
varð þó eigandi  
einn um síðir.

Hón svarar:

Seg þú einn satt mér <sup>9</sup>  
svá láti Áss þik  
heilan í haugi,  
sem þú hefir eigi

1) rettet for einga. — 2) Svöfu, Sváfu. — 3) röndum skryðdir ok roðnum geiri. —  
4) rettet for: megir at meinsamir moldar auka. — 5) görir. — 6) úr munar heimi. —  
7) hauga. — 8) faðir ok ei niðr, ell. faðir niðr. — 9) Segir þú ei satt.

Tyrfing með þèr;  
trautt er þèr at veita  
arfa þínum  
einar böenir <sup>1</sup>.

Þá var sem einn logi væri  
allt at líta um haugana, er opnir  
stöðu. Þá kvað Angantýrr:

Hnigin er helgrind <sup>2</sup>,  
haugar opnask,  
allr er í eldi  
eybarmr at sjá <sup>3</sup>;  
atalt er úti  
um at litask;  
skyndtu, mær, ef þú mátt,  
til skipa þinna.

Hón svarar:  
Brenni þèr ei svá <sup>4</sup>  
bál á nóttum,  
at ek við elda  
yðra fælumk <sup>5</sup>;  
skelfrat meyju  
muntún hugar,  
þó at hón draug sjái  
í durum standa.

Þá kvað Angantýrr:  
Segi ek þèr, Hervör,  
hlýttu til meðan,

vísa dóttir,  
þat er verða mun:  
sjá mun Tyrfingr,  
ef þú trúa mættir,  
ætt þinni, mær,  
allri spilla.

Muntu sun geta,  
þann er síðan mun  
Tyrfing bera,  
ok trúa afli <sup>6</sup>;  
þann munu Heiðrek  
heita lýðar,  
sá man ríkstr alinn  
und röðuls tjaldi.

Hón kvað:

Ek vígi svá  
virða dauða,  
at þèr skulut  
allir liggja  
dauðir með draugum  
í dys fýnir <sup>7</sup>;  
sel mér <sup>8</sup>, Angantýrr,  
út ór haugi,  
hlífum hættan  
Hjálmars bana.

Hann segir:  
Kveðkat ek þik, mær ung,  
mönnnum líka,

1) traubr erta, arf at veita einga barni. — 2) helgrund.

3) allt er í eldi eygrims sjá. — 4) Brennit eigi svá. — 5) *innsat for felumz*.

6) magni. — 7) fólvir. — 8) nema selir mér.

er þú um hauga  
hvarfar<sup>1</sup> á nóttum  
gröfnum geiri  
ok með gota málmi<sup>2</sup>,  
hjálmi ok með brynju  
fyrir hallar dyrr. .

Hón kvað:

Maðr þóttumk<sup>3</sup> ek  
mennskr til þessa,  
áðr ek sali yðra  
sækja hafðak<sup>4</sup>;  
sel þú mēr ór haugi  
þann er hatar brynjur,  
dverga smíði,  
dugir ei þèr at leyna.

Angantýrr kvað:

Liggr mēr und herðum  
Hjálmars bani,  
allr er hann uta  
eldi sveipinn;  
mey veit ek enga  
moldar hvergi<sup>5</sup>,  
at þann hjör þori  
í hendr nema.

Hón segir:

Ek man hirða  
ok í hendr nema,  
hvassan mæki,  
ef ek hafa mættak;  
uggi ek eigi  
eld brennanda,  
þegar loga lægir,  
er ek lít yfir<sup>6</sup>.

Hann kvað:

Heimsk ertu, Hervör,  
hugar eigandi,  
er þú at augum<sup>7</sup>  
í eld hrapar;  
ek vil heldr selja þèr  
sverð ór haugi,  
mær in unga,  
mákat ek þèr synja.

Var þá kastat út sverðinu í  
hönd Hervarar.

Hón kvað:

Vel gördðir þú,  
víkinga niðr,

1) hvarfar. — 2) málum.

3) *her findes den rette form: þotome ek.*

4) reðak.

5) fyrí mold ofan.

6) Hygg ek eigi eld brenna þann, er framliðnum áðrðum leikr um sjónir.

7) for at augum: allgunn.

er þú seldir mér  
sverð ór haugi;  
betr þykkjumk nú,  
buðlungr <sup>1</sup>, hafa,  
enn ek Noregi  
næðak öllum.

Hann kvað:

Veizt eigi þú,  
vesöl ertu mála,  
fáráð <sup>2</sup> kona,  
hverju <sup>3</sup> fagna skal;  
sjá mun Tyrfingr,  
ef þú trúa mættir,  
þinni ætt, mær,  
allri spilla.

Hón segir:

Ek mun ganga  
til gjálfr mara <sup>4</sup>,  
nú er hilmis mær  
í hugum <sup>5</sup> góðum;  
lítt hræðumk <sup>6</sup> þat,  
lofðunga niðr,  
hve synir mínir  
síðan deila.

Hann kvað:

Þú skalt eiga  
ok una lengi,  
hafðu á huldu,  
Hjálmars bana;  
takattu á eggjum,  
eit er í báðum,  
sá er manns mjötuðr <sup>7</sup>  
meini verri.

Far vel, dóttir,  
fljótt gæfa ek þér  
tólf manna fjör,  
ef þú trúa mættir,  
að ok eljun,  
allt it góða,  
þat er synir Arngríms  
at sik leifðu.

Hón kvað:

Búi þér allir,  
brott fýsir mik,  
heilir í haugi,  
hèðan vil ek skjótle;  
helzt þóttumk nú  
heima í millim,  
er mik umhverfis  
eldar brunnu.

Síðan gekk hón til skipa; ok er lýsti, sá hón, at skipin  
váru brottu, höfðu víkingar hræðzk dunur ok elda í eyinni;  
fær hón sér far þaðan, ok er ekki um hennar ferð getit,

<sup>1</sup>) bragningr. — <sup>2</sup>) gættet for fáráð. — <sup>3</sup>) hvi. — <sup>4</sup>) manna. — <sup>5</sup>) huga.

<sup>6</sup>) reki ek. — <sup>7</sup>) mataðr.

fýrr enn hón kemr á Glasisvöllu til Guðmundar, ok var hón þar um vetrinn, ok nefndisk enn Hervarðr.

8. Guðmundr konungr hafði mikit fjölmenni; hann var þá svá gamall, at þat er sögn manna, at hann skorti ei um hundrat vetr, ok var þó fullhraustr. Höfundr sun hans var þá fullroskinn, ok var hann þá at öllum stórmálum kallaðr.

Einn dag, er Guðmundr læk skáktafl, ok hans tafl var mjök svá farit; hánúm gekk miðr, ok var búit við máti; þá spurði hann, ef nökkurr kynni hánúm ráð til at leggja. Þá gekk til Hervarðr, ok lagði litla stund til, áðr Guðmundar var vænna. Hervarðr hafði lagt Tyrfing í sæti sitt, meðan hann gekk at taflinu. Þá tók maðr upp Tyrfing, ok brá; þat sá Hervarðr, ok þreif af hánúm sverðit, ok drap hann, ok gekk út síðan; menn vildu hlaupa eptir hánúm. Þá mælti Guðmundr: „verit kvirrir<sup>1)</sup>! ekki man svá mikil hefnd í manninum, sem þær ætlit, því at þær vitit ekki, hverr hann er, man þessi kvennmaðr ýðr dýrkeyptr, áðr þær fáit hans líf.”

Síðan var Hervarðr langa stund í hernaði, ok varð mjök sigrsæl; ok er henni leiddisk þat, fór hón heim til jarls, móðurföður síns; fór hón þá fram sem aðrar meyjar, at hón vandisk við borða ok handyrðir. Tók hón þá at görask vinsæl ok veitul af peningum, fór ok mikit orð af fríðleik hennar. Þetta spyrr Höfundr, sun Guðmundar, ok ferr hann, ok biðr Hervarar, ok fær, ok flytr heim. Höfundr var manna vitrastr, ok svá rættðæmr, at hann hallaði aldri rættum dómi, hvárt sem í hlut áttu innlenskir eðr útlenskir, ok af hans nafni skyldi sá höfundr heita í hverju ríki, er mál manna dæmdi.

Pau Hervör áttu tvá sunu, hèt annarr Angantýrr, en annarr Heiðrekr; báðir váru þeir miklir menn ok sterkir,

<sup>1)</sup> kyrrir.

vitrir ok vænir. Angantýrr var líkr feðr sínum at skaplyndi, ok vildi hverjum manni gott; Höfundr unni hánnum mikit, ok þar með öll alþýða; ok svá margt gott, sem hann görði, þá görði Heiðrekr enn fleira illt; Hervör unni hánnum mikit. Fóstri Heiðreks hèt Gizurr.

Ok einn tíma, er Höfundr görði veizlu, var öllum höfðingjum tilboðit í hans ríki, utan Heiðreki; hánnum líkaði þat illa, ok kvað vænt at göra veizluspjöll í höll föður síns; Gizurr afræð hánnum þat, ok kvað annat vænligra, enn fara þangat til stríðs föður sínum; — ok fór allt at einu, ok kveðsk skyldu göra þeim nökkut illt. Ok er hann kom í höllina, stóð Angantýrr upp í móti hánnum, ok bað hann sitja hjá sér. Heiðrekr var ekki kátr; hann sat lengi um kveldit, síðan Angantýrr var genginn; hann snèrisk þá til þeirra manna, er hjá hánnum sátu, ok kom hann svá sinni ræðu við þá, at þeir heituðusk við<sup>1</sup>; ok er Angantýrr kom aptr, bað hann þá þegja. Ok öðru sinni, er Angantýrr gekk út, minnti Heiðrekr þá á sitt mál, ok kom þá svá, at hvárr sló annan með hnefa; kom þá enn Angantýrr aptr, ok sætti þá til morgins. Ok it þriðja sinn, er Angantýrr gekk brott, þá mælti Heiðrekr til þess, er sleginn var, hví hann þyrði eigi at hefna sín, ok kvað eigi hæfa blauðum manni vín at drekka; ok svá kom hans fortölu, at sá hljóp upp, er sleginn var, ok drap fèlaga sinn. Heiðrekr hló at þessu ok mælti, at veizlan væri at rausnarligri, er rauðr lögr rynni um dúka. Þá kom Angantýrr inn, ok lèt illa yfir þessu verki. En er Höfundr varð þessa varr, bað hann Heiðrek flýja ór hans ríki, eða fá ella dauða. Gekk þá Heiðrekr út, ok með hánnum bróðir hans; þar kom þá móðir hans, ok fékk hánnum Tyrþing. Þá mælti Heiðrekr: „eigi veit ek, nær ek get svá mikinn mun gört föður míns ok móður, sem

<sup>1</sup>) at þeir urðu rangsáttir.



þau göra mín; faðir minn görir mik útlægjan, en móðir mín gaf mér Tyrfing, er mér þykkir betra enn mikit ríki; ok skal ek göra þat eitthvert, er hán um má verst þykkja;" ok brá þá sverðinu, ok lýsti af mjök ok sindraði; hann eyskraði þá mjök, ok hældi við berserksgang. Nú með því, at þeir bræðr váru tveir saman, en Tyrfingr varð manns banl hvern tíma, er hán um var brugðit, þá hjó hann bróður sinn bana-hügg; ok vann hann fyrstr níðingsverk með sverðinu; þetta var sagt Höfundu. Heiðrekr var þegar brottu í skógi. Höfundr lét göra erfi eptir sun sinn, ok var Angantýrr hverjum manni harmdauði.

Heiðrekr undi stórilla við verk sitt, ok var hann lengi á skógum, ok skaut dýr ok fugla til matar sér; en er hann hugleiddi sitt mál, þá þótti hán um, sem eigi væri gott frásagnar, ef engi vissi, hvat af hán um yrði; kom enn í hug, at hann mætti enn verða frægr maðr af stórum verkum, sem ættmenn hans inir fyrri. Fór nú heim, ok fann móður sína, ok bað hana biðja föður sinn at ráða hán um heilræði at skilnaði. Hón gekk fyrir Höfund, ok bað hann ráða syni sínum heilræði. Höfundr svarar, kveðsk fá mundu kenna hán um, en lét hán um þó verr mundu í hald koma; hann kveðsk ok ekki mundu fyrir hans bæn göra: Þat er it fyrsta, at hann hjálpi eigi þeim manni, er drepit hefir lánardrottin sinn; annat, at hann gefit eigi þeim manni frið, er drepit hefir fælagu sinn; þriðja, at kona hans sé eigi heimanförul til frænda sinna; fjórða, at vera eigi síð úti hjá frillu sinni; fimmta, at ríða eigi bezta hesti sínum, ef hann skal skynda; sætta, at fóstur eigi sér ríkara manns barn; þat it sjaunda, at skyldi jafnan eiga kerski við komanda gest; þat it áttunda, at setja aldri Tyrfing at fótum sér<sup>1</sup>; „en ekki mun hann

<sup>1</sup>) þat sjaunda, at hann gangi aldri á grið sín; þat áttunda, at hann hafi aldri marga hertekna þræla með sér.

hafa af." Móðir hans segir hánnum þessi heilræði. Heiðrekr svarar: „með illum huga munu ráðin vera kennd, enda mun ek ekki af hafa." Móðir hans gaf hánnum mörk gulls at skilnaði, ok það hann sèr jafnan láta í hug koma, hversu bitrt hans sverð var; ok hversu mikit ágæti hverjum hefir fylgt þeim, er bar, ok hversu mikit traust þeim er í hans bitru eggjum, er þat herra í orrustu eða einvígjum, ok hversu mikill sigr því fylgði; ok skildusk þau síðan.

Fór hann leið sína; ok er hann hafði eigi lengi farit, þá mætti hann mönnum; þeir fóru með bundinn mann. Heiðrekr spurði, hvat þessi maðr hefði gört; þeir sögðu hann svikit hafa lánardrottin sinn; hann spurði, „vill þér fè fyrir hann?" Þeir játuðu því. Hann leysti hann fyrir hálfa mörk gulls. Þessi maðr bauð hánnum sína þjónustu; hann segir: „eigi mantu mér trúr úkunnum manni, er þú sveikt herra þinn þann, er þú áttir mart gott at launa." Ok lítlu síðarr fann hann menn nökkura ok einn bundinn; hann spurði, hvat sá hefði gört; þeir sögðu hann myrðt hafa fèlaga sinn. Hann leysti hann fyrir aðra hálfa mörk gulls. Sjá bauð hánnum sína þjónustu, en hann neitaði. Síðan fór hann þar til, er hann kom á Reiðgotaland. Hann fór á fund konungs þess, er þar ræð fyrir, ok Haraldr hét; hann var þá gamall; konungr tók vel við hánnum, ok dvaldisk hann með konungi um hríð.

9. Tveir jarlar höfðu herjat fyrr á ríki Haralds konungs, ok lagt undir sik; ok af því at hann var gamall, þá lauk hann þeim skatt á hverju ári. Heiðrekr kom sèr í vináttu við konung, ok svá kom um síðir, at hann görðisk formaðr herskapar konungs, ok lagðisk hann í hernað, ok görðisk brátt víðfrægr og sigrsæll. Hann herjar nú á jarla þá, er undir höfðu lagt ríki Haralds konungs; varð með þeim hörð orrusta. Heiðrekr vá með Tyrþingi, ok stóðsk

ekki við hánum nú sem fyrr, því at þat beit svá stál sem klæði. Ok um síðir drap hann jarlana báða, en allt þeirra fólk flýði; ok fór hann síðan yfir ríkit, ok lagði undir Harald konung, ok tók þar gisla til, ok fór hann síðan heim. Ok gekk sjálfr Haraldr konungr móti hánum með miklum veg, ok varð hann mjök frægr af þessu. Konungr gipti hánum dóttur sína, er Helga hét, ok gaf hánum hálf t ríki, ok varði Heiðrekr landit fyri báða þá, ok fór svá fram um hrið.

Haraldr konungr átti sun í elli sinni; en annan sun átti Heiðrekr, sá hét Angantýrr. Síðan kom hallæri mikit á Reiðgotaland, þat heitir nú Jútland, ok horfði til landsauðnar. Síðan var felldr blótspánn<sup>1</sup>, ok gekk svá frétin, at eigi mundi fyrri koma ár á Reiðgotaland, enn þeim sveini væri blótat, er æztr væri á landinu. Heiðrekr segir sun Haralds konungs vera æztan, en konungr kallaði sun Heiðreks vera æztan; en ór því máli mátti engi leysa utan Höfundr, því at þar váru allar órlausnir trúar. Heiðrekr fór þá á fund föður síns, ok var hánum þar vel fagnat; beiddi hann nú föður sinn dóms um þetta mál; Höfundr sagði hans sun æztan vera í því landi. Heiðrekr mælti: „hvat dæmir þú þá mēr fyri minn skaða?“ Höfundr segir: „þú skalt skilja þér í móti annan hvern mann í hirð Haralds konungs<sup>2</sup>; síðan þarf engi at kenna þér ráð at slíkum her ok þínum skaplyndi.“ Síðan fór Heiðrekr heim, ok kvaddi þings, ok sagði dóm föður síns: „at hann dæmdi sun minn til blóts, en mēr til hugganar dæmdi hann mēr annan hvern mann þann er með Haraldi konungi er, ok vil ek, at þér sverlt mēr þetta;“ ok svá gördu þeir. Þá báðu bæendr, at hann lèti fram sun sinn, ok bætti árferð þeirra. Heiðrekr mælti þá

<sup>1</sup>) Váru þá görvir blutir af víslindamönnum ok felldr blótspánn til.

<sup>2</sup>) Þú skalt beiðask, at hinn fjórði hverr maðr sé á þínu valdi, sá er við blótt er staddr, ella muntu ei lèta sun þínn til blóts.

við sína menn, síðan skilt var liðit, þá beiddisk hann af nýju trúnaðarelda af sínum mönnum; ok þeir gördðu þat, at þeir <sup>1</sup> sóru hánun, at fylgja hánun utanlands ok innan til þess, er hann vildi. Hann mælti þá: „svá lízk mér sem goldit muni vera Óðni fyrir einn svein, ef þar kemr fyrir Haraldr konungr ok sun hans ok herra hans allr.“ Hann bað nú setja upp merki sitt, ok veita Haraldi konungi atgöngu, ok drepa hann ok allt lið hans; varð Heiðrekr konungr banamaðr mága sinna; er þat talit annat niðingsverk unnit með Tyrfinngi eptir álögum dvergsins. Kveðsk hann þetta fólk gefa Óðni fyri sun sinn, ok lét rjóða stalla blóði konungs ok Hálfðánar sunar hans; kona hans fór sèr <sup>2</sup> í dísar sal. Var nú Heiðrekr til konungs tekinn yfir allt þat ríki.

10. Þat var eitt sumar, at Heiðrekr konungr fór með her sinn suðr í Húnaland <sup>3</sup>, ok barðisk við konung þann, er Humli hét, ok fékk sigr, ok tók þar dóttur hans, er Sifka <sup>4</sup> hét, ok hafði hana heim með sèr; en at öðru sumri sendi hann hana heim, ok var hón þá með barni. Litlu síðar fœddi hón sveinbarn, ok var sá sveinn kallaðr Hlóðr; ok var allra manna fríðastr sýnum, ok fósturaði hann Humli móðurfaðir hans.

Heiðrekr konungr fór í hernað, ok kom við Saxland; hann hafði mikinn her. Konungr af Saxlandi <sup>5</sup> sendi hánun menn, ok gördðu þeir frið sín í millim, ok lét konungr bjóða Heiðreki til veizlu, ok þat þá hann. At þeirri veizlu bað Heiðrekr dóttur konungs, er Óluf hét, ok fékk hennar með miklu fè ok ríki, ok við þat fór Heiðrekr heim í ríki sitt. Hón beiddisk opt at finna föður sinn; hann lét þat eptir henni, ok fór með henni Angantýrr, stjúpsun hennar.

Ok eitt sinn, er Heiðrekr kom ór hernaði, lá hann við

1) rettet for þeir at. — 2) hengði sik sjálf. — 3) Hundland.

4) Svafa. — 5) sa konungr hét Áki, er þar reði fyrir.

Saxland í eisu leyni<sup>1</sup>; hann gekk um nótt á land upp, ok kom hann í þá skemmu, er drottning hans svaf í; einn maðr gekk með hánum; varðmenn allir sváfu; hann sá fagran mann í sæing hjá konu sinni; hann tók sun sinn Angantý, ok hafði með sér; hann skar ór lepp<sup>2</sup> ór hári þess manns, ok fór síðan til skips. Um morguninn lagði hann í konungslægi, ok gekk þá allt fólk móti hánum, ok var hánum þá búin veizla. Ok er þeir höfðu drukkit um stund, gekk Óluf drottning í höllina, ok fagnaði vel Heiðreki konungi, ok breiddi báðar hendr um háls hánum; hann tók því fálaga. Litlu síðar lét hann þing stefna, ok spurði, hvat menn vissi til sunar hans; drottning sagði, at hann varð bráðdauðr; hann hað fylgja sér til leidis hans; drottning sagði, at þat mundi auka harma hans; hann kveðsk ekki þat hirða; var þá til leitat, ok var þar hundr sveipaðr í dúki. Heiðrekr kvað eigi sun sinn vel hafa skipazk; lét hann nú leiða fram sveininn á þingit, ok segir þá allan atburð um framferð drottningar; lét konungr þá leiða fram þann mann, er í hvífunni hafði verit, ok var þat þræll einn. Heiðrekr sagði þar skilit við drottningu, ok fór heim síðan í ríki sitt.

Hèlt hann þá enn í hernað, ok fór svá fram um hrið. Hann tók enn af Finnlandi at herfangi konu þá, er enn hét Sifka; hón var allra þeirra kvenna frídust, er menn höfðu sèt.

Eitt sumar sendi hann menn austr í Hólmgarða, at bjóða Hrollaugi konungi barnfóstr, er þá var ríkastr konungr; því at Heiðrekr konungr vildi öll ráð föður síns á bak brjóta. Sendimenn koma til Hólmgarðs, ok segja konungi sín erendi. Konungr átti sun ungan, er Herlaugr hét. Konungr svaraði: „hver ván man þess, at ek senda hánum sun minn til fóstrs, þar sem hann sveik Harald konung mág sinn ok aðra frændr sína ok vini?“ Drottning mælti: „afsvarit þessu ekki svá

1) í leynivag nökktrum. — 2) *rettei for*. ut legg; *andre*: lokk.

skjótt, því at viss er þér úfriðr, ef þú þiggir eigi þetta boð; vænti ek, at þér fari sem flestum öðrum, at þungur verði hans úfriðr; hefir hann ok sverð þat, er ekki stenzk við, ok sá hefir jafnan sigr, er berr.” Tók konungr þat til ráðs, at senda sun sinn til Heiðreks, ok tók Heiðrekr vel við hánum, ok fœddi hann upp, ok unni mikit.

11. Þat hafði faðir hans enn ráðit hánum, at segja eigi frillu sinni leynda hluti sína.

Sumar hvert fór Heiðrekr konungr í hernað; jafnan fór hann í Austrveg, ok átti friðland með Hrollaugi konungi. Einn tíma bauð Hrollaugr hánum til veizlu. Heiðrekr ræðsk um við vini sína, hvárt hann skyldi þiggja boð konungs. Flestir löttu, ok báðu hann minnask heilræða fœdur síns. Hann svarar: „öll hans ráð skal ek rjúfa,” ok sendi þau orð konungi, at hann mundi sækja veizluna. Heiðrekr skipti liði sínu í þrjá staði, einn lét hann gæta skipa, annarr fór með hánum, þriðja bað hann ganga á land, ok leynask í skógi hjá bönum, þar sem veizlan skyldi vera, ok halda njósn til, ef hánum yrði liðs þörf. Heiðrekr kom til veizlunnar. Fóru konungar á skóg, ok margt lið manna með þeim at beita hundum ok haukum; en er þeir höfðu lausum slegit hundunum, fóru sér hverir á skóginn; þá urðu þeir tveir saman fóstarr, þá mælti Heiðrekr við konungs sun: „hlýð þú boði mínu, fóstri, hær er þær skammt í frá, far þú þangat ok fel þik, ok þigg til hring þenna, vertu þá heim búinn, er ek læt sækja þik;” sveinninn kvaðsk úfúss þessarrar ferðar, en görði þó svá sem konungr beiddi. Ok annan dag, er konungar váru komnir í sæti, þá spurði Heiðrekr, hvar vera mundi konungs sun, fóstri hans. Leitat var hans, ok fannsk hann eigi. Heiðrekr var mjök úkátr, ok gekk snemma at sofa; en er Sifka kom þar, spurði hón, hví hann var úkátr. Hann svarar: „vant er um þat at tala,

því at þar liggr við líf mitt, ef upp kemr.” Hón kveðsk leyna mundu, „ok gör fyrir ást okkra, ok seg mër!” Hann segir: „ek reið í gær á skóg at skemmta mër, ok sá ek einn villigölt, ok lagða ek hann með spjóti, en þat beit ekki, ok brast sundr skaptit. Ek hljóp þá af hestinum, ok brá ek Tyrfini; hann beit sem vant var, ok drap ek göltinn, en er ek sá um mik, þá var engi maðr nær mër utan konungs sun, en sú náttúra fylgði Tyrfini, at hann skal sliðra<sup>1</sup> með vörmu mannsblóði, ok drap ek þá sveininn. Nú er þetta minn bani, ef Hrollaugr konungr spyr, því at vèr höfum hær lítinn her.” En um morguninn, er Sifka kom til drottningar, spurði drottning, hví Heiðrekr var úkátr. Hón kveðsk eigi þora at segja. Drottning taldi henni hughvarf, svá at hón sagði drottningu allt þat, er Heiðrekr hafði henni sagt. Hón svarar: „mikil tíðindi!” ok gekk brott með harmi miklum, ok sagði konungi: „en þó hefir Heiðrekr eigi gört þetta eptir vilja sínum.” Konungr mælti: „nú gáfusk mër ráð þín, sem ek hugsaða;” gengr konungr nú út ór höllinni, ok biðr nú sína menn vápnask. Heiðrekr þóttisk vita, hvat Sifka hafði sagt, ok segir mönnum sínum, at þeir herklæddisk leyniliga: „ok gangit svá úti í riðlum, ok vitit, hvat títt er!” Litlu síðar kom Hrollaugr konungr inn, ok bað Heiðrek ganga með sèr á einmæli; ok er þeir komu í einn grasgarð, þá hlupu þar menn at Heiðreki, ok gripu hann, ok settu fjötr á fœtr, ok bundu hann sterkliga. Tveir menn váru þar, er fastast bundu hann, ok kenndi hann þá, at þat váru þeir menn, er hann hafði leyst undan bana. Konungr bað fletja hann til skógar ok hengja hann. Þeir váru tvau hundrut manna; en er þeir komu í skógin, þá hlupu eptir þeim menn Heiðreks konungs með vápnum hans ok merki ok lúðri, ok blèsu þegar, er þeir komu eptir þeim.

---

<sup>1</sup>) skelða.

Þat heyrðu þeirra kumpánar, er á skóginum leyndusk; þá sóttu þeir móti þeim. En er þetta sá landsmenn, þá flýðu þeir allir, er lífit þágu, en flestir váru drepnir. Tóku Gotar þar konung sinn ok leystu. Síðan fór Heiðrekr til skipa, ok hafði með sér konungs sun, því at hann lét hann vera hjá þeim mönnum, er í skóginum leyndusk.

Hrollaugr konungr samnar nú her, ok varð mjök fjölmennr, en Heiðrekr herjaði í hans ríki, hvar sem hann fór. Hrollaugr konungr mælti þá til drottningar: „illa hafa mér þín ráð gefizk; ek hefi spurt, at sun okkarr er með Heiðreki, ok svá sem hann er nú reittr, þá man hán um með illvirki sín lítit þykkja fyrir at drepa hann, þar sem hann drap bróður sinn saklausan.” Drottning mælti: „halzti höfu vèr verit auðtrygg; sáttu þegar vinsæld hans, er engi vildi fjötra hann, nema tveir illir menn, en sun okkarr er vel haldinn; hefir þetta verit prettr hans ok tilraun, en þér vildut illa launa hán um barnfóstr; gör nú menn til hans; ok bjóð hán um sætt, ok slíkt af ríki þínu, sem ykk semr, ok bjóð hán um dóttur þína með ríki, ef vit nām syni okkrum, heldr enn þit skillzk úsáttir. En þó at hann eigi ríki mikit, þá á hann eigi konu jafnfríða.” Konungr segir: „eigi hafða ek ætlat at bjóða hana nökkurum, en af því at þú ert vitr, þá skaltu ráða.”

Váru nú sendir menn til Heiðreks konungs at leita um sættir, ok var komit á stefnulagi, ok sættusk þeir með því, at Heiðrekr fekk Hergerðar, dóttur Hrollaugs konungs, ok fylgði henni heiman Vindland, er næst liggir Reiðgotalandi, ok skildusk þeir sáttir. Fór Heiðrekr konungr heim í ríki sitt með konu sinni.

Einn tíma er konungr reið bezta hesti sínum, er hann skyldi láta flytja Sifku heim, þat var síð um kveld, ok er konungr kom at á einni, þá sprakk hestr hans, en konungr



gekk af fram; þá skyldi hann bera hana yfir ána, ok litlu stöðar kom hón millim herða hánum; hann kastaði henni þá ofan, ok braut í henni fótlegginn; skilr svá við hana, at hana rekr dauða eftir ánni.

12. Síðan settisk Heiðrekr konungr at ríki sínu, ok gördisk spekingr mikill. Dóttir þeirra Hergerðar hét Hervör; hón var skjaldmær ok fœddisk upp í Englandi með þeim manni, er Ormr<sup>1</sup> hét; hón var allra meyja vænst, ok mikil ok sterk sem karlar. Hón samdi<sup>2</sup> sik með örvar ok boga.

Gestr inn blindi<sup>3</sup> hét einn ríkr maðr í Reidgotalandi; hann var í úblíðu Heiðreks konungs. Í konungs hirð váru þeir tólf menn, er dæma skyldu öll mál manna þar í landi. Heiðrekr konungr blótaði Frey<sup>4</sup>; þann gölt, er mestan fékk, skyldi hann gefa Frey<sup>5</sup>; kölluðu þeir hann svá helgan, at yfir hans burst skyldi sverja um öll stór mál, ok skyldi þeim gelti blóta at sónarblóti<sup>6</sup>; jólaaptan skyldi leiða sónar-göltinn í höll fyrir konung; lögðu menn þá hendr yfir burst hans, ok strengja heit. Heiðrekr konungr lagði hönd sína á höfut geltinum, en aðra á burst, ok strengði þess heit, at engi maðr skyldi svá mikit hafa af gört við hann, ef á vald hans kæmi, at eigi skyldi kost eiga, at hafa dóm spekinga hans; hann skyldi ok friðheilagr vera fyrir hánum, ef hann bæri upp gátur þær, er konungr kynni eigi ór at leysa. En er menn freistuðu at bera upp gátur fyrir hánum, þá varð engi sú upp borin, er hann ræði eigi.

Konungr sendi orð Gesti inum blinda, at hann kæmi til hans, ok setti hánum dag, ella sagðisk konungr mundu

1) Ormarr, Froðmarr. — 2) *ell.* vandl.

3) *indsat for Gestum blindi, som findes i begge membraner.* — 4) Freyu.

5) Heiðrekr konungr lét ala gölt mikinn; hann var svá mikill sem öldungar þeir er stærstir eru, en svá fagr, at hvert hár þót í ór gulli vera.

6) til árþótar í upphafi mánaðar þess, er febrúarius heitir; þá skyldi blót hafa til farsældar.

láta koma menn til hans. Hánum þótti hvárrgi góður kostrinn, því at hann vissi sik vanfæran at skipta orðum við konung; hánum þótti ok sín ván eigi góð, ef hann skyldi at hafa dóm spekinga, því at sakir váru nógar; veit hann ok, ef konungs menn koma til hans, at þat kostar líf hans. Síðan blótaði hann Óðin, ok bað hann fulltings, ok hèt hánum stórum gjöfum.

Eitt kveld kom gestr til Gests blinda; hann nefndisk Gestr inn blindi. Þeir váru svá líkir, at hvárgan kenndi fyrir annan. Þeir skiptu klæðum, ok fór bóndi at hirða sik, enn allir hugðu þar vera bónda, er gestrinn var.

Þessi maðr ferr á konungs fund <sup>1</sup>, ok heilsar hánum. Konungr sá við hánum, ok þagði. Gestr mælti: „því em ek hér kominn, herra, at ek vil sættask við yðr.“ Konungr spurði: „viltu hafa dóm spekinga?“ Gestr mælti: „eru engar fleiri undanlausnir?“ Konungr segir: „bera máttu upp gátur, skaltu lauss, ef ek sè eigi.“ Gestr svarar: „lítt er ek þar til færr, en harðr er á annat borð.“ Konungr mælti: „viltu heldr dóminn?“ „Nei,“ segir hann, „heldr vil ek bera gáturnar upp.“ Konungr mælti: „þat er ok rétt, en mikit liggr á; sigrar þú mik, þá skaltu eiga dóttur mína, ok á þèr eigi þessa at varna, en úlíkr ertu til mikillar speki, en aldri varð þat enn, at ek sá eigi gátur þær, er fyrir mik váru upp hornar.“ Var síðan stóll settr undir Gest inn blindi, ok hugðu menn gott til, at heyra þar vitrlig orð. Þá mælti Gestr inn blindi:

Hafa vildak  
þat es í gær hafðak,  
vittu <sup>2</sup> hvat þat var:  
lýða lemill <sup>3</sup>,

orða tefill <sup>4</sup>  
ok orða upphæfill.  
Heiðrekr konungr,  
hygg þú at gátu!

<sup>1</sup>) Um daginn eftir görir Gestr ferð sína á konungs fund, ok léttr elgi fyrir enn hann kemr í Árhelma; hann gengr í höllina. — <sup>2</sup>) gettu. — <sup>3</sup>) femill. — <sup>4</sup>) temill.

Heiðrekr syrar:

Góð er gáta þín,  
Gestr blindi,  
getit er þeirrar:  
munngát lemr<sup>1</sup> æði,  
ok örvar mælgí,  
en öðrum vefsk tunga um  
tönn.<sup>2</sup>

Þá mælti Gestr:

Heiman ek fór,  
heiman ek för gürðak<sup>3</sup>,  
sá ek á veg vega;  
vegr var undir,  
vegr var yfir,  
ok vegr á alla vega.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
fugl þar yfir fló,  
fiskr þar undir svamm,  
þú gekz árbrú yfir.

Þá mælti Gestr:

Hvat var þat drykkjar,  
er ek drakk í gær?

varat þat vatn nè vín,  
mjöðr nè munngát,  
nè matar ekki,  
þó gekk ek þorstalauss þaðan.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
fórtu holu í,  
falsk þik í skugga<sup>4</sup>,  
þar fèll dögg í dali;  
þar namtu þer  
af náttðöggu,  
ok kældir svá kverkr þaðan<sup>5</sup>.

Þá mælti Gestr:

Hverr er sá hinn hveli,  
er gengr harðar götur,  
ok hefir hann þær fyrrum farit;  
mjök fast kyssir,  
ok hefir munna tvá,  
gengr á gulli einu.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,

1) semr. — 2) en sumum vefsk tungu bragð. — 3) heiman ek ferðaðisk.

4) lagðisk þú í forsetu. — 5) ok kældir svá varir þínar.

getit er þeirrar:  
gengr hamar gullsmiðs  
á glóð Rínar,  
kveðr við hátt  
er <sup>1</sup> kemr á steðja.

Þá mælti Gestr:

Hvat er þat undra,  
er ek úti sá  
fyri dellings <sup>2</sup> durum?  
úkvikvir tveir,  
andalausir,  
sára lauk suðu.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
erat blærr, nè bruni,  
í belgjum smiða,  
hafat þeir líf nè lá;  
má þó fyri þeim  
mæki smiða  
við þann gust, er gefa.

Þá mælti Gestr:

Hvat er þat undra,  
er ek úti sá  
fyri dellings durum?  
fœtr hefir átta,

fjögr augu,  
ok berr ofar knè enn kvið.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
austan gekktu  
at innis durum  
salkynni at sjá;  
komtu þar at  
er köngurváfa  
vef ór þörmum vaf.

Þá mælti Gestr:

Hvat er þat undra,  
er ek úti sá  
fyri dellings durum?  
höfði sínu vísar  
á helvegu,  
en fótum til sólar snýr.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
höfuð veit

1) ok. — 2) Her og siden: derlings, dögling.

í hlóðýnjar skaut,  
en blöð í lopt, á lauk <sup>1</sup>.

Þá mælti Gestr:

Hvat er þat undra,  
er ek úti sá  
fyri dellings durum?  
horni harðara,  
hrafni svartara,  
skjalli skygnara <sup>2</sup>,  
skapti rættara.  
Heiðrekr konungr,  
hygg þú at gátu.

Heiðrekr svarar:

Smækka tekr nú  
smíði gátu,  
hvat skulu búnum bið?  
leiztu á leiðir,  
lá hrafntinna,  
glóði geisla mót.

Þá mælti Gestr:

Báru hrundir <sup>3</sup>,  
bleikhaddaðar  
ambáttir tvær,  
öl til skemmu;  
varat þat höndum horfit,

nè hömrum <sup>4</sup> klappat;  
sjá var út við eyjar  
örðigr, er görði <sup>5</sup>.  
Heiðrekr konungr,  
hygg þú at gátu.

Heiðrekr svarar:

Góð er gáta þín,  
Gestr blindi,  
getit er þeirrar:  
ham bera svanir  
hvítfaðraðan,  
er við eyjar  
á víði sitja;  
hendr nè höfðu,  
hreiðr þeir byggðu,  
á gaglehálsum <sup>6</sup>  
egg við gátu <sup>7</sup>.

Þá mælti Gestr:

Hverjar 'ru þær rýgjar  
á reginfjalli?  
elr við kván kona,  
mæ'r við meyju  
mög of getr,  
ok eigut þær varðir vera.  
Heiðrekr konungr,  
hygg þú at gátu!

<sup>1</sup>) höfud hans horfir í jörðu, en lauks blöðin í lopt.

<sup>2</sup>) skildi skygnara *ell.* hvítara.

<sup>3</sup>) bróðir. — <sup>4</sup>) hamr. — <sup>5</sup>) er ker görði. — <sup>6</sup>) *Uvis læsemåde.*

<sup>7</sup>) *De prosaiske forklaringer have her blandt andet:* þat eru æðar tvær þær er eggjum verpa; eggin eru el gör með hamri nè höndum, en þjónustumeysjar báru öllt í eggskurminni; en svanr er fyri eyjar utan, örðigr sá, er þær gátu eggin við.

Heiðrekr svarar:

Góð er gáta þín,  
Gestr blindi,  
getit er þeirrar:  
fjallhvannir tvær  
fanntu standa  
ok þriðju unga  
þeirra í millum.<sup>1</sup>

Þá mælti Gestr:

Fara ek sák  
foldar moldauka<sup>2</sup>,  
ok sat nár<sup>3</sup> á nái;  
blindr reið blindum  
brimreiðar<sup>4</sup> til,  
þá jór var andarvani.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
jó fanntu dauðan  
á jaka liggja,  
örn<sup>5</sup> á tafni;  
þat bar á ísi  
ár til samans  
straumr ströndu at.

Þá mælti Gestr:

Hverlr 'ru þegnar,  
er ríða þingi at,  
sáttir allir saman<sup>6</sup>?  
lýða sína senda  
þeir lönd yfir  
at byggja bólstaði.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
Ítrekr ok Öndóttir<sup>7</sup>  
um aldrdaga  
tefla teitir skák;  
sátt er þeim lið allt,  
er í sjóð kemr,  
en á reitum reitt.

Þá mælti Gestr:

Hverjar 'ru þær drósir<sup>8</sup>,  
er um sinn drottin  
vápnláusar vega<sup>9</sup>?  
inar dökkvari<sup>10</sup> hlífa<sup>11</sup>  
um daga alla,  
en inar fegri fara<sup>12</sup>.

1) ok hvannarkálf á millum þeirra. — 2) moldbúa.

3) naðr. — 4) brimheiðar. — 5) ormr.

6) ok eru sextán saman. — 7) Andaðr. — 8) bráðir.

9) er sinn drottin vápnalausar vega. — 10) jarpari.

11) hlífa. — 12) fýfa.

Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
duga hnefatöflur  
dökkvar í tafla,  
en hvítar herja á mót.

Þá mælti Gestr:

Hverr er sá inn eini,  
er sefr í ösgrúa<sup>1</sup>,  
af grjóti einu görr?  
föður nè móður á sá  
inn fargjarni<sup>2</sup>,  
þar mun hann sinn aldr ala.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
eld elr aska  
í arni fólgin,inn,  
tinna getr hann grjót.

Þá mælti Gestr:

Hverr er sá inn mörkvi<sup>3</sup>,  
er mold ferr yfir<sup>4</sup>?  
svelgr hann vatn ok við<sup>5</sup>,  
glygg hann óask,  
en guma ekki,  
ok yrkir á sól til saka.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
gengr upp mörkvinn  
ór Gýmis fletjum,  
ok heldr af hlýrni sýn;  
sá drepr skini  
Dvalins leiku,  
flýr einn Fornjóts bur.

Þá mælti Gestr:

Hvert er þat dýra,  
er drepr fè manna,  
ok er jární allr<sup>6</sup>  
urinn í kring?  
horn hefir átta,  
en höfuð ekki,  
ok fylgja því margir mjök<sup>7</sup>.

1) öskugrúa.

2) fargjarni, fjargjarni, faggjarni, fæfargjarni.

3) mikill. — 4) líðr mold yfir.

5) vötn ok velsur. — 6) utan.

7) ok rennr sem hann má.

Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
húni man sjá vera  
í hnefatafli,  
frekr ok flárr til fjár.

Þá mælti Gestr:

Hvert er þat dýra,  
er dönum hlífir?  
berr blóðugt bak,  
en benjar fyr<sup>1</sup>,  
geirum mætir,  
gefr líf sitt fram,  
leggr við lófa  
lík sit guma.

Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
skildir blika  
í bardögum,  
en verja þá, er valda.

Þá mælti Gestr:

Hverjar eru þær leikur,  
er líða lönd yfir,  
ok leika af muni margt?  
hvítan skjöld þær  
of haust<sup>2</sup> bera,  
en svartan of sumar.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
rjúpur kalla  
rekka synir  
fiðrvarðan fugl;  
sortnar fiðr  
á sumartíma,  
en bliknar um bjarnar nótt.

Þá mælti Gestr:

Hverjar 'ru snótir,  
er syrgjandi ganga  
at forvitni föður?  
mörgum þær hafa  
at meini orðit,  
við þat sinn aldr ala.  
Heiðrekr konungr,  
hygg þú at gátu.

1) en bergr firum.

2) vetr.



Heiðrekr svarar:

Góð er gáta þín,  
Gestr blindi,  
getit er þeirrar:  
eðlis<sup>1</sup> brúðir,  
eitri blandnar,  
fara mörgum fyrir.

Þá mælti Gestr:

Hverjar eru þær meyjar,  
er ganga margar saman  
at forvitni föður?  
hadda bleika hafa þær  
inar hvítfölduðu,  
megat þeim varða verar.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
Gýmir hefir sèr  
getit dóetr  
ráðsviðar við Rán;  
bylgjur þær heita  
ok báru,  
verr þeim vera engi.

Þá mælti Gestr:

Hverjar 'ru ekkjur,  
er allar ganga saman

at forvitni föður?  
sjaldan 'ru blíðar  
við seggja lið,  
ok eigu í vindi vaka.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
öldur þat eru,  
Ægis dóetr,  
þær láta fallask fast.

Þá mælti Gestr:

Nóg var forðum  
nösgás vaxin,  
barngjörn sú er bar  
bútimbr saman;  
hlífðu henni  
hálms bitskálmir,  
þó lá drykkjar  
drynhrönn yfir.  
Heiðrekr konungr  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
áttir þú líta

1) eðlis.

andarfygli  
eggjum sitja á;  
numit var staðar  
með nauts hausi,  
en kjálkar gördðu kví.

Þá mælti Gestr:

Hverr er sá inn mikli,  
er mörgu ræðr,  
sér <sup>1</sup> til heljar hálf?  
höldum hann bergr,  
en við svörð <sup>2</sup> saðask,  
ef hann hefir sér vel traustan  
vin.

Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
dugir atkeri  
með digru togi  
flotna sjöt <sup>3</sup> á sæ;  
fleini þat hrífr  
í fold niðr,  
ok horfir til heljar svá.

Þá mælti Gestr:

Hverjar 'ru brúðir,  
er í brimskerjum ganga <sup>4</sup>,  
ok eigu eptir firði för?  
harðan heð hafa  
inar hvítfölduðu,  
ok leika í logni fátt.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
bárur ok brekar  
ok boðar görvallir  
leggjask loks á sker;  
heðir eru þeirra  
björg ok urðir,  
en sátt er sæfar logn <sup>5</sup>.

Þá mælti Gestr:

Sá ek á sumri  
sólbjörgum í <sup>6</sup>  
verðung vaka  
veigu teita <sup>7</sup>;  
drukku jarlar

1) horfir. — 2) Jörð, hjörð. — 3) *indsat for skaut*.

4) er í brimskerjum vaða.

5) en þær verða lítt sýnar í logni.

6) sólbjörg of á.

7) *indsat for vilgi teiti eller vigi teita; der læses ellers verðung vaka vilgi teiti*  
*ell. verðung vaka vigi teita, ell. það ek vel lifa vilgi teiti.*

öl þegjandi,  
 en æpanda  
 ölker stóð.  
 Heiðrekr konungr,  
 hygg þú at gátu!

Heiðrekr svarar:

Góð er gáta þín,  
 Gestr blindi,  
 getit er þeirrar:  
 grísar þegjandi  
 gylti drukku,  
 en hón rýtti af raun <sup>1</sup>.

Þá mælti Gestr:

Hverr byggir há fjöll?  
 hverr fellr í djúpa dali?  
 hverr andalauss lifir?  
 hverr æfa þegir?  
 Heiðrekr konungr,  
 hygg þú at gátu!

Heiðrekr svarar:

Góð er gáta þín,  
 Gestr blindi,  
 getit er þeirrar:  
 hrafn byggir há fjöll,  
 döggr fellr í djúpa dali,  
 fiskr án anda  
 í flóði lifir,  
 en þjótandi fors  
 þegir aldregi.

Þá mælti Gestr:

Meyjar ek sá  
 móldu líkar,  
 váru þeim at beðjum björg,  
 svartar ok sámar  
 í sólviðri,  
 en þess at fegri, er færri of sér<sup>2</sup>.  
 Heiðrekr konungr,  
 hygg þú at gátu!

Heiðrekr svarar:

Góð er gáta þín,  
 Gestr blindi,  
 getit er þeirrar:  
 í ösku fólgnar,  
 á arni fölnaðar  
 gaztu glæður sjá.

Þá mælti Gestr:

Fjórir ganga,  
 fjórir hanga,  
 tveir veg vísa,  
 tveir hundum varða,  
 einn eptir drallar<sup>3</sup>  
 æfi daga,  
 sá er jafnan saurugr.  
 Heiðrekr konungr,  
 hygg þú at gátu!

Heiðrekr svarar:

Góð er gáta þín,  
 Gestr blindi,  
 getit er þeirrar:

1) en hón hrein fyrir. — 2) fæða af sér. — 3) drattar.

kýr er þat dýra,  
er þú knáttir sjá  
fjórum ganga fótum,  
fjórir hanga spenar,  
en horn hana vörðu,  
hali hëkk at baki.

Þá mælti Gestr:

Sat ek á segli,  
sák dauða menn  
blóðs<sup>1</sup> hold bera  
í björk<sup>2</sup> viðar.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
saztu á arni<sup>3</sup>,  
þar sástu val fljúga,  
sá bar æðarfugl  
sèr í klóm.

Þá mælti Gestr:

Hvat er þat undra,  
er ek úti sák  
fyri dellings durum?  
tíu hefir tungur,  
tuttugu augu,  
fjörutíu fóta,  
fram líðr sú væltr.

Heiðrekr konungr,  
hygg þú at gátu!

Heiðrekr svarar:

Vánum þykki mér þú nú  
vitrari vera,  
ef sá ert, er segir,  
er þú gautar  
of gylti úti,  
þá er í garði gekk;  
var sú þá sundruð  
at vísis ráði,  
ok gekk hón með grísi níu.

Þá mælti Gestr:

Hverlr eru þeir tveir,  
er til þings fara,  
þrjár hafa þeir sjónir saman,  
tíu fœtr  
ok tagl eitt báðir,  
ok líða svá lönd yfir.  
Heiðrekr konungr,  
hygg þú at gátu!

Heiðrekr svarar:

Góð er gáta þín,  
Gestr blindi,  
getit er þeirrar:  
þat er Óðinn,  
þá er Sleipni ríðr fram,  
eitt á hann auga,  
en marr bæði,

1) blóðugt. — 2) björk. — 3) á veg ell. vegg (for vigg).

dregr skeið fótum  
drösuill átta,  
Yggr<sup>1</sup> tveimr;  
hestr á hala einn.

en engi veit þau orð þín,  
utan þú sjálfr,  
ill vættr ok örm<sup>2</sup>!

Þá mælti Gestr:  
Seg þú mér þat eina,  
alls þú vera þykkir  
hverjum kóngi hyggjari<sup>2</sup>:  
hvat mælti Óðinn  
í eyra Baldri,  
áðr hann var á bál borinn?

Brann skap konungi,  
brá hann Tyrfingi,  
ok hugði at höggva Gest;  
en hann við brást  
í vals líki,  
ok forðaði svá fjörvi.

Heiðrekr svarar:  
Undr ok argskap  
ok alla bleyði,  
skí ok skrípi ein,

Leitaði undan  
á ljóra valr,  
en hilmir eptir hjó;  
vèli skar aptan,  
ok skemmdi fjaðrar,  
því berr hann stýfðan stert.

Óðinn mælti þá: fyri þat, Heiðrekr konungr, at þú  
røðsk sverði til mín, ok vildir drepa mik saklausan, ok  
gekkst sjálfr á grið þau, er þú settir millum okkar, skulu  
þær hinir verstu þrælar at bana verða. Eptir þat skilr  
með þeim.

13. Nökkuru síðar býst konungr heiman, ok vildi skipa  
lögum um ríki sitt; hann hafði sèr náttstað settan undir  
fjöllum þeim, er Hárvaðafjöll<sup>4</sup> váru köllut; þótti mönnum  
hans sú dagferð ærit löng. Konungr bað velja þann frásta  
hest sèr til reiðar; valdi hann til ferðar með sèr níu þræla,  
þá hafði hann tekit í vestrvíking<sup>5</sup>, ok váru þeim fengnir þeir

<sup>1</sup>) rettet for Iggr; ett Håndskrift Aar Siggeir. — <sup>2</sup>) vitrari.

<sup>3</sup>) illvættir ok ormr. — <sup>4</sup>) Hærvaðafjöll, Hávaðafjöll.

<sup>5</sup>) váru þeir teknir í vestrvíking í Skotlandi, þeir váru ættstórir menn, ok kunnu illa  
áfrelsi sínu.

beztu reiðskjótar; riðu þeir nú með konungi, ok margir menn aðrir. Konungr reið svá mikinn, at engi gat fylgt hánnum nema þrælarnir ok fáir menn aðrir. Komu þeir um kveldit undir Hárvaðafjöll, ok reistu þar tjöld sín. En er konungr var sofnaðr með sínum mönnum, stóðu upp þrælarnir, ok drápu alla varðmennina; síðan gengu þeir í tjaldit, þangat sem konungr lá, tóku þeir nú Tyrfing ok brugðu, ok myrðu með hánnum Heiðrek konung, ok alla þá, er þar inni váru. Er þetta talt hit þriðja níðingsverk unnit með Tyrfingi, eptir því sem dvergrinn hafði fyrimælt; váru nú enduð þau álög.

Höfðu nú þrælarnir Tyrfing í braut með sèr, ok allt þat er í tjaldinu var fæmætt. Um morguninn eptir komu menn Heiðreks konungs, ok fundu hann dauðan; sendu þeir þá heim at segja Angantýr tíðindin. Hann lætr þegar reisa haug mikinn þar undir Hárvaðafjöllum í þeim stað, sem konungrinn var drepinn; var sá haugr víðum snúinn ok görr rambyggiligr; var Heiðrekr þar í lagðr ok þeir menn, er myrðir váru með hánnum.

Síðan var þing stefnt, ok Angantýrr til konungs tekinn yfir öll þau ríki, er Heiðrekr konungr hafði átt. Á þessu þingi strengði hann heit, at aldri fyrr skyldi hann setjask í hásæti föður síns, enn hann hefði hefnt hans.

Litlu síðar hverfr Angantýrr í braut einn saman, ok ferr víða at leita þrælanna. Eitt kveld gengr hann ofan til sjófar með á þeirri, er Grafá<sup>1</sup> hét. Þar sá hann þrjá menn á fiskibát; því næst sá hann, at maðr dró fisk, ok kallar, at annarr skyldi fá hánnum agnsaxit at höfða með fiskinn; en sá kvæðsk eigi laust mega láta. Hinn mælti: „taktu sverðit undan höfðafjölinni<sup>2</sup>, ok fá mér.” En sá tók, ok brá, ok sneið höfuðit af fiskinum. Þá kvað hann vísu:

1) Greipá, Grípsá.

2) í lyptingunni.

Þess galdt hón gedda  
fyrí Grafár ósi,  
er Heiðrekr var veginn  
undir Hárvaðafjöllum.

Angantýrr kenndi þegar Tyrfing; gekk hann þá í brott í skóginn, ok dvaldisk þar til þess er myrkt var; en þessir fiskimenn ræru at landi, ok fóru til tjalds þess, er þeir áttu, ok lögðusk til svefns. En nær miðri nótt kom Angantýrr þar, ok felldi á þá tjaldit, ok drap þá alla níu þræla, en tók sverðit Tyrfing, ok var þat þá til marks, at hann hafði hefnt föður síns. Ferr Angantýrr nú heim.

Því næst lætr Angantýrr göra vezlu mikla á Danparstöðum á þeim bæ, er Árheimar heita<sup>1</sup>, at erfa föður sinn. Þá reðu þessir konungar löndum, sem hér segir:

Ár kváðu Humla  
fyrir her ráða,  
Gizurr Gautum,  
Gotum Angantýrr,  
Valdar Dönum,  
en Völum Kjár<sup>2</sup>,  
Álfrekr<sup>3</sup> inn frækni  
Euskri þjóðu.

Hlöðr<sup>4</sup>, sun Heiðreks konungs, föddisk upp með Humla konungi, móðurföður sínum, ok var allra manna fríðastr sýnum ok drengiligastr. En þat var fornt mál þann tíma, at maðr væri borinn með vápnum eðr hestum; en þat var til þess haft, at þat var mælt um þau vápn, er þá váru þeim gür þann tíma, er maðrinn var föeddr, svá ok fè, kykvendi,

<sup>1</sup>) á þeim bæ er Dampstaðir heita í Árheimum, er sumir kalla Ernathérað, var þat höfustborg á Reiðgoialandi í þann tíma.

<sup>2</sup>) en Völlum Ákjar. — <sup>3</sup>) *rettet for* Alrekr. — <sup>4</sup>) Hlödverr.

yxu eðr hestar, ef þat var þá fœðt, ok var þat allt fœrt  
saman til virðingar tignum mönnum, sem hær segir um  
Hlöd Heiðrekssun:

Hlöd var þar borinn  
í Húalandi <sup>1</sup>  
saxi ok með sverði,  
síðri brynju,  
hjálmi bringreifðum,  
hvössum mæki,  
mari vel tömum,  
á mörk inni helgu.

Nú spyrr Hlöd fráfall föður síns, ok þat með, at  
Angantýrr, bróðir hans, var til konungs tekinn yfir allt þat  
ríki, sem faðir þeirra hafði átt. Nú vilja þeir Humli kon-  
ungr ok Hlöd, at hann fari at krefja arfs Angantýr, bróður  
sinn, fyrst með góðum orðum, sem hær segir:

Hlöd reið austan,  
Heiðreks arfi <sup>2</sup>,  
kom at garði þar,  
er Gotar byggja  
á Árheima,  
arfs at kveðja;  
þar drakk Angantýrr  
erfi Heiðreks kóns.

Nú kom Hlöd í Árheima með miklu liði, sem hær segir:

Segg fann hann úti  
fyri sal háfum,  
ok síðförlan  
síðan kvaddi:

---

<sup>1</sup>) í Humlalandi. — <sup>2</sup>) *ell*, mögr.



inn gakkstu, seggr,  
í sal háfan,  
bið mèt Angantýr  
andspjöll bera.

Sá gekk inn fyri konungs borð, ok kvaddi Angantýr  
vel, ok mælti síðan:

Hér er Hlöðr kominn,  
Heiðreks arfþegi,  
bróðir þinn  
inn beðskammi<sup>1</sup>;  
mikill er sá mjök  
á mars baki,  
vill nú þjóðann  
við þik tala.

En er konungur heyrði þetta, þá varpaði hann knífinum  
á borðið, en stó undan borðinu, ok steypði yfir sik brynju,  
ok tók hvítan skjöld í hönd, en sverðið Tyrfing í aðra hönd.  
Þá gördisk gnýrr mikill í höllini, sem hér segir:

Rymr var í ranni,  
risu með goðum<sup>2</sup>,  
vildi hverr heyra  
hvat sem Hlöðr mælti,  
ok þat er Angantýrr  
andsvör veitti.

Þá mælti Angantýrr: „vel þú kominn! vel þú verir!  
gakk inn með oss til drykkju, ok drekkum mjöð eptir föður  
okkarn, fyrst til sama ok öllum oss til vegs, með öllum  
várum sóma.” Hlöðr svarar: „til annars fórum vèr hingat,  
enn at kýla vömb vára.”

1) inn beðskammi *ell.* hinn beðskárl. — 2) *ell.* góðum; *hela læsemáden er uviss.*



Mun ek þik sitjanda  
 silfri mæla <sup>1</sup>,  
 en ganganda þik  
 gulli steypa,  
 svá á vegu alla  
 velti haugar;  
 þriðjung Goðþjóðar,  
 því skaltu ráða.

14. Gizurr Gyrtingaliði <sup>2</sup>, fóstri Heiðreks konungs, var þá með Angantýr konungi; hann var þá ofrgamall; ok er hann heyrði boð Angantýrs, þótti hánú hann of mikit bjóða, ok mælti:

Petta er þiggjanda  
 þýjar barni,  
 barni þýja,  
 ok þótt sè borinn konungr;  
 þá hornungr.  
 á haugi sat,  
 er öðlingr  
 arfi skipti.

Hlöðr reiddisk nú mjök, er hann var þýbarn ok hornungr kallaðr, ef hann þægi boð bróður síns; snèri hann þá þegar í braut með alla sína menn, til þess er hann kom heim í Húnaaland til Humla konungs, móðurföður síns, ok sagði hánú, at Angantýrr, bróðir hans, hefði unnat hánú þriðjungaskiptis. Humli konungr spurði allt tal þeirra, ok varð hann þá reiðr mjök, er Hlöðr, dótturson hans, skyldi ambáttarsun heita, ok mælti:

Sitja skulum. vèr í vetr  
 ok sælliga lifa,

---

1) véla. — 2) Gyrtingaliði.

drekka ok dæma  
 dýrar veigar,  
 kenna Húnum  
 vápn at búa,  
 þau er djarfliga  
 skulum fram bera.

Ok enn kvað hann:

Vel skulum þér, Hlöðr,  
 herlið búa,  
 ok ramligar<sup>1</sup>  
 hildir heyja,  
 með tólf vetra mengi  
 ok tvævetrum fola,  
 svá skal Húna  
 her um safna.

Um vórit drógu þeir her saman svá mikinn, at aleyða  
 var eptir í Húnalandi vígra manna. Allir menn fóru tólf  
 vetra gamlir ok eldri, þeir er herfærir váru at vápnnum ok  
 hestum, því at allir fóru tvævetrir ok eldri. Varð nú svá  
 mikill fjöldi manna þeirra, at þúsundum mátti telja, en ei  
 smærri enn þúsundir í fylkingar. En höfðingi var settr yfir  
 þúsund hverja, en merki yfir hverja fylking, en fimm þús-  
 undir í hverja fylking, þeirra er þrettán hundrut váru í hverri,  
 en í hvert hundrut fernir fjörutíu, en þessar fylkingar váru  
 þrjár ok þrjátígi. Sem þessi herr kom saman, riðu þeir  
 skóg þann, er Myrkviðr heitir, er skilr Húnaland ok Reid-  
 gotaland<sup>2</sup>. En sem þeir komu af skóginum, þá váru byggðir  
 stórar og vellir sléttir, en á völlum stóð borg ein fögr;  
 þar ræð fyrir Hervör, systir Angantýrs ok Hlöðrs, ok með  
 henni Ormr<sup>3</sup>, fóstri hennar; váru þau sett þar til land-  
 gæzlu fyrir her Húna; höfðu þau þar mikit lið.

1) frálíga. — 2) Gothaland. — 3) Ormarr.

14. Þat var einn morgun um sólar upprás, at Hervör stóð upp á kastala einum yfir borgarhliði; hón sá jóreyki stóra suðr til skógarins, svá löngum fal sólina; því næst sá hón görla undir jóreykinum sem á gull eitt liti, fagra skjöldu ok gulllagða, gyllta hjálma ok hvítar brynjur. Sá hón þá, at þetta var Húna herr ok mikill mannfjöldi. Hervör gekk ofan skyndiliga, ok kallar lúðrsvein sinn, ok bað blása saman lið. Ok síðan mælti Hervör: „takit vápn yðar, ok búisk til orrustu, en þú, Ormr, rið í mót Húnum, ok bjóð þeim orrustu fyrir borgarhliði inu syðra.” Ormr kvað:

Skal ek víst riða,  
 ok <sup>1</sup> rönd bera  
 Gauta þjóðum <sup>2</sup>  
 gunni at heyja.

Þá reið Ormr af borginni mót Húnum; hann kallaði þá hátt, ok bað þá riða til borgarinnar ok áti fyrir borgarhliðinu suðr á vellinum: „þar býð ek yðr til orrustu, biði þeir þar annarra, er fyrr koma.” Nú reið Ormr aptr til borgarinnar; ok var þá Hervör albúin ok allr hennar herr. Síðan riðu þau út af borginni með allan herinn mót Húnum; hófsk þar allmikil orrusta. En með því at Húnar hafa her miklu meira, snèri mannfallinu í lið þeirra Hervarar, ok um síðir fell Hervör ok mikit lið umhverfis hana. En er Ormr sá fall hennar, þá flýði hann ok állir þeir er lítt dugðu. Ormr reið dag ok nótt sem mest mátti hann á fund Angantýrs konungs í Árheima. Húnar taka nú at herja um landit víða ok at brenna. Ok sem Ormr kem fyrir Angantýr konung, þá kvað hann:

Sunnan em ek kominn,  
 at segja spjöll þessi:

---

<sup>1</sup>) í. — <sup>2</sup>) kyndum.

sviðin er öll  
 Myrkviðar heiði,  
 drifin öll Goðþjóð  
 gumna blóði.

Ok enn kvað hann:

Mey veit ek  
 Heiðreks dóttur,  
 systur þína,  
 signa til jarðar;  
 hafa Húnar  
 hana fellda  
 ok marga aðra  
 yðra þegna;  
 lættari gördisk<sup>1</sup> —  
 hón á hauðri<sup>2</sup>  
 enn við biðil ræða,  
 eða í bekk at fara  
 at brúðargangi.

Angantýrr konungur, þá er hann heyrði þetta, brá hann grönnum; ok tók seint til orða, ok mælti þetta um síðir: „úbróðurliga vartu leikin, hin ágæta systir!“ ok síðan leit hann yfir hirðina, ok var ekki margt lífs með hánnum; hann kvað þá:

Mjök váru vèr margir,  
 er vèr mjöð drukkum,  
 nú eru vèr færri,  
 er vèr fleiri skyldum;  
 sè ek eigi þann  
 í mínu liði,  
 þótt ek biði  
 ok baugum kaupi,

1) lítari ell. lítok. — 2) baðml. *Hele stedet er fordærret.*

er muni ríða,  
ok rönd bera,  
ok þeirra Húna  
herlið finna <sup>1</sup>.

Gizurr gamli sagði:

Ek mun þar einskis  
eyris krefja,  
nè skuldanda  
skarfs ór gulli <sup>2</sup>;  
þó mun ek ríða,  
ok rönd bera,  
Húna þjóðum  
gunni at bjóða.

Þat váru lög Heiðreks konungs, ef herra var í landi, en landskonungr haslaði völl, ok lagði orrustustað, þá skyldu víkingar ekki herja fyrr enn orrusta væri reynd. Gizurr herklæddisk með góðum vápnum, ok hljóp á hest sinn, sem ungr væri; þá mælti hann til konungs:

Hvar skal ek Húnum  
hervíg kenna?

Angantýrr konungr svað:

Kenndu á Dyngju <sup>3</sup>  
ok á Dúnheiði,  
ok á þeim öllum  
Jösur-fjöllum <sup>4</sup>;  
báru opt Gotar  
ok geir háðu <sup>5</sup>,  
ok fagran sigr  
frægir unnu.

1) ell. ok þeim Húnum herboð bjóða. — 2) ell. nè skjallrauda skást ór gulli.  
3) Dyngju. — 4) Jossar-f. — 5) ell. þar opt Gotar gunni háðu.

Nú reið Gizurr í braut, ok þar til er hann kom í her Húna; hann reið ei nærr enn svá, at hann mætti tala við þá; þá kallar hann hárrí röddu, ok kvað:

Felmtr er yðarr fylkir,  
feigr er yðarr vísir,  
grœfr<sup>1</sup> yðarr gunnfáni<sup>2</sup>,  
gramr er yðr Óðinn.

Ok enn:

Byð ek yðr at Dyngju  
ok á Dúnheiði,  
orrustu undir  
Jösurfjöllum;  
hræsi yðr  
at há hverju,  
ok láti svá Óðinn  
flein fljúga,  
sem ek fyrir mæli.

Þá er Hlöðr hafði heyrt orð Gizurar, kvað hann:

Taki þér Gizur,  
mann Angantýrs,  
kominn af Árheimum!

Humli konungr sagði:

Eigi skulum  
árum spilla.  
þeim er fara  
einir saman.

Gizurr mælti: „eigi göra Húnar oss felmtraða<sup>3</sup>, nè hornbogar yðrir.” Gizurr drap þá hest sinn með sporunum, ok reið á fund Angantýrs, ok gekk fyrir hann, ok kvaddi hann vel. Konungr spurði, hvárt hann hefði fundit Húna konung:

<sup>1</sup>) græfr. — <sup>2</sup>) gunnfari. — <sup>3</sup>) vélada, viesada, feltraða.



Gizurr mælti: talaða ek við þá, ok stefnda ek þeim á vígvöll á Dúnheiði í Dyngjudölum. Angantýrr spyrr, hvat mikit lið Húnar hafa? Gizurr mælti:

Mikit er  
mengi þeirra:  
sex ein eru  
segga fylki <sup>1</sup>,  
í fylki hverju  
fimm þúsundir,  
í þúsund hverri  
þrettán hundrut,  
í hundraði hverju  
halir fjórtaldir <sup>2</sup>.

Angantýrr spyrr nú til Húna; þá sendi hann menn alla vegu frá sèr, ok stefndi hverjum manni til sín, er hán um vildi lið veita, ok vápnum mátti valda. Fór hann þá á Dúnheiði með lið sitt ok var þat allmikill herra; kom þá á móti hán um herra Húna, ok höfðu þeir lið hálfu meira.

15. Á öðrum degi hófu þeir sína orrustu, ok börðusk allan þann dag, ok fóru at kvældi í herbúðar sínar. Þeir börðusk svá átta daga, at höfðingjarnir váru þá allir heilir, en engi vissi manntal, hvat margt féll. En bæði dag ok nótt dreif lið til Angantýrs af öllum áttum; ok þá kom svá, at hann hafði ekki færri flokk enn í fyrstu. Varð nú orrustan enn ákafari enn fyrr; váru Húnar ákafir, ok sáu þann sinn kost, at sú ein vár lífs ván, ef þeir sigruðusk ei, ok illt mundi Gota um grið at biðja. Gotar vörðu frelsi sitt ok fóstrjörð fyrir Húnum; stóðu því fast, ok ekkjaði hverr annan.

Þá er á leið daginn, görðu Gotar atgöngu svá harða, at fylkinga Húna svignaði fyrir; ok er Angantýrr sá þat, gekk

<sup>1</sup>) fimm hundrut eru í fylki. — <sup>2</sup>) hals fjórtaldir ell. hálfs fjórtaldir.

hann fram ór skjaldborginni, ok í öndverða fylking, ok hafði í hendi Tyrfing, ok hjó þá bæði menn ok hesta. Raufsk þá fylking fyrir Húna konungum, ok skiptusk þeir bræðr höggum við. Þar féll Hlöðr ok Humli konungr; ok þá tóku Húnar at flýja, en Gotar drápu þá, ok felldu svá mikinn val, at ár stemmdusk ok fëllu ór vegum, en dalir váru fullir af dauðum mönnum ok hestum.

Angantýrr gekk þá at kanna valinn, ok fann Hlöð bróður sinn á einum háfum hól. Þá kvað hann:

Bauð ek þær, bróðir,  
 basmir úskerðar <sup>1</sup>,  
 fè ok fjöld meiðma,  
 sem þik fremst <sup>2</sup> tíddi;  
 nú hefir þú hvárki  
 hildar at gjöldum  
 ljósa bauga  
 nè land ekki.

Ok enn kvað hann:

Bölvat er okkr, bróðir,  
 bani em ek þinn orðinn;  
 þat mun enn uppi,  
 illr er dómr norna.

Lèt Angantýrr síðan heygja hann á þeim sama hól, sem hann hafði fallit, ok þrjá aðra með hánum, þá fremstu, sem áðr eru nefndir; en öllum almúga var ruðt saman í stóra bunka, ok ausit moldu yfir. Var þessi orrustustaðr átta mílur í kring, sem valrinn hafði fallit; sèr nú enn í dag merki til hauganna.

[Er þat sagt, at Reiðgotaland ok Húnaland sè nú Pýðskaland kallat; Pýðskaland er talit tólf konungaríki, sem Norvegr.]

<sup>1</sup>) *rettet for*: úskertar; *andre*: óskir tvær. — <sup>2</sup>) *rettet for*: mik fremst.

16. Angantýrr var lengi konungr í Reiðgotalandi; hann var ríkr ok auðmaðr mikill<sup>1</sup>, ok eru frá hánum komnar konungaættir. Sun hans var Heiðrekr Úlfshamr, er síðan var lengi konungr á Reiðgotalandi; hann átti dóttur, er Hildir hét; hón var móðir Hálfðánar snjalla, föður Ívars hins víðfaðma<sup>2</sup>. Ívarr hinn víðfaðmi kom með her sinn í Svíaveldi, sem segir í konungasögum; en Ingjaldr konungr hinn illráði hræddisk her hans, ok brenndi sik sjálfir inni með allri hirð sinni, á þeim stað er á Ræningi heitir. Ívarr hinn víðfaðmi lagði þá undir sik allt Svíaveldi; hann vann ok Danaveldi ok Kúrland, Saxland ok Eystland, ok öll Austríki allt til Garðaríkis; hann ræð ok Vestra-Saxlandi, ok vann hlut Englands, þat er kallat Norðymbraland. Ívarr hinn víðfaðmi lagði þá undir sik allt Danaveldi, ok síðan setti hann þar yfir Valdar konung; ok gipti hánum Álfhildi dóttur sína. Þeirra sun var Haraldr hilditönn, ok Randverr, er síðan féll á Englandi. En Valdarr andaðisk í Danmörk. Tók þá Randverr Danaríki, ok görðisk konungr yfir. En Haraldr hilditönn lét gefa sér konungsnafn í Gautlandi<sup>3</sup>, ok síðan lagði hann undir sik öll framan nefnd ríki, er Ívarr konungr hinn víðfaðmi hafði átt.

Randverr konungr fékk Ásu, dóttur Haralds konungs ins gottrauda norðan ór Noregi<sup>4</sup>. Sun þeirra var Sigurðr hringr. Randverr konungr varð bráðdauðr. En Sigurðr hringr tók konungdóm í Danmörk. Hann barðisk við Harald konung hilditönn á Brávellu í Eystra-Gautlandi<sup>5</sup>, ok þar féll Haraldr konungr ok mikill fjöldi liðs. Þessarrar orrustu hefir helzt verit getit í fornum sögum, ok mest mannfall í orðit, ok sú er Angantýrr ok Hlödðr bróðir hans börðusk á Dúnheiði.

1) rettet for aurmaðr mykill.

2) rettet for víðfarma, som stár her overalt.

3) rettet for Gothlandi. — 4) Haraldar konungs ór Geirraugar görðum í Noregi.

5) rettet for Gothlandi.

Sigurðr konungr bringr ræð Danaríki til dauðadags; en eptir hann Ragnarr konungr loðbrók sun hans. Sunr Haralds hilditannar hæt Eysteinn hinn illráði; hann tók Svíaríki eptir föður sinn, ok ræð því þar til er synir Ragnars konungs felldu hann, svá sem segir í hans sögu. Þeir synir Ragnars konungs lögðu þá undir sik Svíaveldi. En eptir dauða Ragnars konungs tók Björn sun hans járnstíða Svíaveldi, Sigurðr Danaveldi, Hvítserkr Austríki, Ívarr beinlausí England. [Hans sun var Áslákr; sunr Ásláks var Haraldr hrygg, faðir Björns byrðusmjörs; hans sunr var Þorðr, er nam fyrstr Höfðaströnd í Skagafirði á Íslandi, einn hinn ágætasti landnámsmanna; hann átti ellifu sunu ok átta dætr, ok eru miklar ættir frá hánum komnar.]

Synir Bjarnar járnstíðu váru þeir Eirekr ok Refill; hann var herkonungr ok sækonungr, en Eirekr varð konungr yfir Svíaríki eptir föður sinn, ok lifði litla hríð. Þá tók ríki Eirekr sun Refils; hann var mikill hermaðr ok allríkr konungr.

Bjarnar synir váru þeir Eirekr Uppsali ok Björn konungr; þá kom Svíaríki enn í bræðraskipti; þeir taka ríki eptir Eirek Refilssun. Björn konungr efldi þann stað, er at Haugl heitir; hann var kallaðr Björn at Haugl; með hánum var Bragi skáld.

Önundr hæt sun Eireks konungs, er ríki tók eptir föður sinn at Uppsölum; hann var ríkr konungr; á hans dögum hófsk til ríkis í Noregi Haraldr konungr hinn hárfagri, er fyrstr kom einvaldi í Noreg sinna ættmanna. Björn hæt sun Önundar konungs at Uppsölum; hann tók ríki eptir föður sinn, ok ræð lengi. Synir Bjarnar váru þeir Eirekr hinn sigrsæli ok Ólafr; þeir tóku ríki eptir föður sinn ok konungdóm. Ólafr var faðir Styrbjarnar hins sterka; á þeirra dögum andaðisk Haraldr konungr hinn hárfagri. Styrbjörn barðisk við Eirek konung föðurbróður sinn á Fírisvöllum;

þar fèll Styrbjörn; síðan ræð Eirekr Svíaríki til dauðadaga. Hann átti Sigríði ina stórráðu; Ólafr hèt sun þeirra, er til konungs var tekinn í Svíþjóð eptir Eirek konung; hann var þá barn, ok báru Svíar hann eptir sèr, því kölluðu þeir hann skautkonung, en síðan Ólaf sænska. Hann var lengi konungr ok ríkr; hann tók fyrst kristni Svíakonunga, ok um hans daga var Svíþjóð köllut kristin. Önundr hèt sun Ólafs konungs Sænska, er konungdóm tók eptir hann, ok varð sótt dauðr. Á hans dögum fèll Ólafr konungr helgi á Stiklastöðum. Eyvindr <sup>1</sup> hèt annarr sun Ólafs sænska, er konungdómi tók eptir bróður sinn; um hans daga hèldu Svíar illa kristni; Eyvindr var litla hríð konungr.

Steinkell hèt ríkr maðr í Svíaríki ok kynstórr; móðir hans hèt Ástríðr, dóttir Njáls Finnssunar <sup>2</sup> ins skjálga af Hálogalandi, en faðir hans var Rögnvaldr hinn gamli. Steinkell var fyrstr jarl í Svíþjóð; en eptir dauða Eyvindar konungs tóku Svíar hann til konungs; þá gekk konungdómrinn ór langfeðgaætt í Svíþjóð inna fornu konunga. Steinkell var mikill höfðingi; hann átti dóttur Eyvindar konungs; hann varð sótt dauðr í Svíþjóð nær því er Haraldr konungr fèll á Englandi.

Ingi <sup>3</sup> hèt sun Steinkels, er Svíar tóku til konungs næst eptir Steinkel <sup>4</sup>. Ingi var þar lengi konungr ok vinsæll ok vel kristinn; hann eyddi blótum í Svíþjóð, ok bað fólk allt þar at kristnask, en Svíar höfðu of mikinn átrúnað á heiðnum goðum, ok hèldu fornum síðum. Ingi konungr gekk at eiga þá konu, er Mær hèt, bróðir hennar hèt Sveinn; Inga konungi þóknadizk engi maðr svá vel, ok varð Sveinn því í Svíþjóð hinn ríkasti maðr. Svíum þótti Ingi konungr brjóta

1) således står her overalt.

2) rettet for d. Niatzelsson.

3) Ingimundr — 4) Hakon.

forn landslög á sær, er hann vandaði um þá hluti marga, er Steinkell faðir hans hafði standa látit. Á þingi nökkuru, er Svíar áttu við Inga konung, gördðu þeir hánnum tvá kosti, hvárt hann vildi heldr halda við þá forn lög, eða láta af konungdómi; þá mælti Ingi konungr, ok kvaðsk ei mundu<sup>1</sup> kasta þeirri trú, sem rétt væri; þá æptu Svíar upp, ok þröngðu hánnum með grjóti, ok ráku hann af lögbinginu. Sveinn, mágr konungs, var eptir á þinginu; hann bauð Svíum at esla blót fyrir þeim, ef þeir gæfi hánnum konungdóm; því játa þeir allir. Var Sveinn þá til konungs tekinn yfir alla Svíþjóð, var þá fram leiðt hross eitt á þingit, ok hoggvit í sundr, ok skipt til áts, en rjóðuðu blóðinu blóttre. Köstuðu þá allir Svíar kristni, ok hófusk blót, en þeir ráku Inga konung í braut, ok fór hann í Vestra-Gautland. Blót-Sveinn var þrjá vetr konungr yfir Svíum. Ingi konungr fór með hirð sína ok sveit nökkura, hafði þó lítinn her; hann reið austr um Smáland ok í Eystra-Gautland, svá í Svíþjóð, reið bæði dag ok nótt, ok kom úvart Sveini snemma um morgun; þeir tóku á þeim hús, ok slógu í eldi, ok brenndu þat lið er inni var. Þjófr hét lendr maðr, er þar brann inni, hann hafði áðr fylgt Blót-Sveini. Sveinn gekk út, ok var drepinn. Ingi tók svá konungdóm at nýju yfir Svíum, ok leiðrætti þá enn kristnina, ok ræð ríkinu til dauðadags, ok varð sóttidauðr.

Hallsteinn hét sun Steinkels konungs, bróðir Inga konungs, er konungr var með Inga konungi bróður sínum. Synir Hallsteins váru þeir Philippus ok Ingi, er konungdóm tók í Svíþjóð eptir Inga konung gamla. Philippus átti Ingigerði dóttur Haralds konungs Sigurðssunar; var hann skamma stund konungr.

---

<sup>1)</sup> rettet for mundi.

## Varianter og tillæg.

Side 3, lin. 6.

*Isteden for de to sidste sætninger:* en áðr enn Tyrkjar ok Asíamenn komu í Norðrlönd, byggðu norðrálfuna risar ok hálfrisar; görðisk þá mikit sambland þjóðanna; risar fengu sér kvenna ór Mannheimum, en sumir giptu þangat dótr sínar.

Side 10, lin. 4.

*Herefter findes, også i den fulgte membran:* Oddr svarar: „Þat mundi mitt ráð vera, at vit flýðim undan á skóg; munum vit ekki megna tveir, at berjask við þá tólf, er drepit hafa tólf hina fræknustu menn, er váru í Svíaríki.” Þá mælti Hjálmarr: „flýjum vit aldri undan úvinum okkrum, ok þolum heldr vápn þeirra; fara vil ek at berjask við berserkina;” *hvilket kortere og smukkere udtrykkes således i Verelii udgave:* Nú mælti Oddr: „tveir eru kostir fyrir höndum: at flýja í skóginn eða bíða ok verja hendr várar.” Þá kvað Hjálmarr: „flýjum vèr aldri fyrir herjendum okkrum, þó nökkut údælir þykki.” *Det er klart, at dette tillæg, på det sted, hvor membranen har det, forstyrrer sammenhængen, som gengives i de følgende vers.*

Side 11, lin. 23.

*Isteden for dette stykke har den vidtløftigere fortælling:* Angantýrr mælti: „þat vil ek, sagði hann, at

ef nökkurt vár kemsk á braut hëðan, þá skal engi annan ræna at vápnum, ok vil ek hafa Týrfing í haug með mër, þótt ek deyl; svá skal Oddr hafa skyrtu sína, en Hjálmarr hervápn, ok svá við skilja, at þeir skulu verpa haug eptir hina, er lifa. Síðan ganga þeir Hjálmarr ok Angantýrr saman, ok berjask með hinum mesta ákafa, var þar hvárigum um sókn nè vörn at frýja; hjuggu þeir bæði hart ok tíðum, ok óðu jörðina at knjám; var því líkast sem logandi bál, er stálin möettusk; gáir nú hvárigr annars, enn höggva sem tíðast, en landit skalf, sem á þræði lèki, af sameign þeirra; börðusk þeir svá lengi, þar til hlífar þeirra tóku at höggvask; veitti þá hvárr öðrum stór sár ok mörg; en svá mikill reykr gaus af nösum þeirra ok munni, sem ofn brynni. Hefir Oddr svá sagt síðan, at aldri mundi sjásk hermannligri sókn eða fegri vápn enn í því einvígi; er þat ok frægt víða í sögnum, at fáir muni frægri fundizk hafa eðr drengiligar barizk. Ok er þeir Oddr höfðu lengi hër á horft, gengu þeir í annan stað, ok bjuggusk til bardaga. Oddr mælti til berserkjanna: „þèr munut vilja hafa hermanna sið, en ei þræla, ok skal einn yðar berjask við mik um sinn, en ei fleiri, svá framt sem yðr bilar ei hugr; þeir játa því. Gekk þá fram Hjörvarðr, en Oddr snèri hán um í móti; hafði Oddr svá gott sverð, at þat heit svá vel stál sem klæði; síðan hófu þeir sitt einvígi með stórum höggum, ok var ei langt, áðr enn Hjörvarðr féll dauðr til jarðar; en er hinir sáu þat, afmynduðusk þeir ákafliga, ok gnöguðu í skjaldarrendrnar, en froða gaus ór kjapti þeim. Þá stóð upp Hervarðr, ok sótti at Oddi; ok fór sem fyrr, at hann féll dauðr niðr. Við þessi atvik eyskraði sútt í berserkjunum, réttu út tungarnar, ok urguðu saman tönnum, öskrandi sem blótneyti, svá buldi í hömrnum. Óð þá fram Sæmingr; hann var þeirra ellifu mestr, ok gekk næst Angantýrr; sótti hann svá fast at Oddi, at hann hafði nóg at verjask fyrir hán um; börðusk þeir svá lengi, at ei mátti í milli sjá, hvárr sigrask mundi; hjuggusk af þeim allar hlífar, en skyrtan dugði svá Oddi, at hann sakaði eigi; hárusk þá sár á Sæming, ok gaf hann sik ei við þat, fyrr enn nær var höggvit allt hold hans af beinunum, sá Oddr hvergi úblóðgan stað á hán um, ok



er blóð hans var allt ór æðum runnit, fæll hann með mikilli breysti, ok var þegar dauðr. Síðan stóð upp hverr at öðrum, en svá lauk, at Oddr felldi þá alla; var hann þá ákafliga móðr, en ekki-sárr. Snýr hann síðan þangat til sem þeir Angantýrr ok Hjálmarr höfðu barizk; var Angantýrr þá fallinn, en Hjálmarr sat við þúfu eina, ok var fölr sem nár.

Side 13, lin. 7.

*Isteden for dette stykke have de udførligere:* Oddr var þar um nóttina; um morgininn bar hann saman alla berserkina, ok tók síðan til haugagörðar; röðuðu eyjar-skeggjar saman stórar eikr eptir fyrirsögn Odds, ok jusu síðan yfir grjóti ok sandi; var þat mikit þrekvirki ok traust gört; var Oddr at þeirri iðju í hálfan mánuð; síðan lagði hann þar í berserkina með vápnum þeirra, ok byrgði síðan aptr haugana. Þessu næst tók Oddr Hjálmar, ok bar hann á skip út, ok flutti heim til Svíþjóðar, segjandi þessi tíðindi konungi ok dóttur hans; fékk henni svá mikils fall Hjálmars, at hón sprakk þegar af harmi, ok váru þau Hjálmarr í einn haug lagin, ok drukkit erfi eptir þau. Dvaldisk Oddr þar um hríð, ok er hann ór sögunni. *Membranen har:* Síðan fóru þeir bræðr brott, ok komu til Sámseyjar, ok gengu upp á land at leita Hjálmars; ok fóru þeirra skipti svá sem greinir í Örvarodds sögu, fyrst at þeir komu í Munarvága, ok drápu þar alla menn af þeim tveim skipum, sem þeir Hjálmarr ok Oddr áttu; ok síðan fundusk þeir uppi á eyinni; drap Oddr ellifu bræðr Angantýrs, en Hjálmarr drap Angantýr, ok dó þar sjálfr síðan af sárum. Síðau lét Oddr leggja þá í stóra hauga alla með öllum sínum vápnum, en flutti Hjálmar heim til Svíaríkis. Ok þegar Ingibjörg konungsdóttir sá lík Hjálmars, þá fæll hón dauð niðr, ok eru þau heygð bæði saman at Uppsölum.

Side 20 b, lin. 9.

*Her indskydes af nogle en strofe, der kun er en variant af den næstforegående:*

Hón kvað:  
 Ek mun hirða  
 ok í hönd nema  
 hvassan mæki,  
 er mik hafa látit;

uggi ek eigi þat,  
 úlfa greinir,  
 hvat synir mínir  
 síðan telja.  
 Hann kvað:

Side 27, lin. 19.

Ok er mjök var alþýða komin, þá mælti konungr: „Eigi er enn gullbárinn kominn.” Þá var enn leitat, ok fannsk maðr í steikarahúsi ok band um höfut; margir undruðusk, því hann skyldi til þings, þræll einn vándr. En er hann kom til þings, þá mælti Heiðrekr konungr: „hèr megi þèr nú þann sjá, er konungsdóttir vill eiga heldr enn mik;” hann tók nú leppinn, ok bar við hárit, ok átti þat saman at fara.

Side 43 a, lin. 11.

*Et håndskrift, som kun indeholder gåderne i en temmelig forskellig orden, har blandt andet endnu følgende:*

*Efter gåden om smcdebælgene:*

Gestr mælti:

regndropar sökkvask í sand ok  
 sökja í jörð.

Hvat er þat undra,  
 er ek úti sá  
 fyrri döglinga durum?  
 Hvítir fljúgendr  
 hellu ljósta,  
 en svartir í sand grafask.  
 Heiðrekr konungr (o. s. v.)

Gestr mælti:

Svartan gölt ek sá  
 í sauri vaða,  
 ok reis hán um ei bust á baki.  
 Heiðrekr konungr (o. s. v.)

Góð er gáta. Smættask nú  
 gáturnar, en þat er hagl ok regn,  
 því at hagli lýstr á stræti, en

Góð er gáta. Þat er torf-  
 dýfill, ok er nú margt til tínt,  
 er torfdýflar eru ríkra manna  
 spurningar.

*Efter gáden om soen med de ni grise:*

Gestr mælti:	harðar eru hilmí.
Hvat er þat undra (o. s. v.)	Heiðrekr konungr (o. s. v.)
Úvarliga flýgr,	Góð er gáta. Ör er þat,
armloð gellr,	segir konungr.

*Efter gáden om edderkoppen:*

Gestr mælti:	Góð er gáta. Þat er sól,
Hvat er þat er lýðum lýsir,	hón lýsir lönd öll, ok skínn yfir
en logi gleypir,	alla menn, en Skalli ok Hatti
ok keppask um þat vargar	heita vargar, þat eru úlfar; er
ávallt.	annarr þeirra fram fyri, en an-
Heiðrekr konungr (o. s. v.).	narr eptir sólu.

Side 47, lin. 29 — Side 48 a, lin. 3.

*Et håndskrift har for dette og de næstfølgende linier:*

Angantýrr gekk út ok	vín ok mjöð
kvað:	hvárt þèr valdara þykkir.

Heill kom þú, Hlöðr,  
 Heiðreks föðurs,  
 bróðir miun, gakk,  
 á bekk at sitja!  
 drekkum Heiðreks  
 hallarveiga,  
 föður okkar  
 fyrstr manna,

Þá kvað Hlöðr:  
 Til annars vèr  
 hingat fórum,  
 enn öl at drekka;  
 þiggja af þjóðan  
 þínar veigar,  
 nema ek hálft hafi  
 þat er Heiðrekr átti (o. s. v.).

Side 51, lin 23.

Ormr reið fram í her Húna, ok drap svá margan mann, at seint er at telja, ok var þeim öngum lífs ván, er hann náði til með sverðinu, ok báðar hendr hefir hann blóðgar til axla. Nú sem Hervör sèr, at hennar lið fellr, varð hón ákaflika reið, ok höggr til beggja handa bæði menn ok hesta, drap hón jafnan sex menn í hverju huggi, ok hrökk allt

undan henni, var hón líkari leóni enn manni at sjá; öngum mætti hón svá hraustum, at eigi tæki skjótt dauðann fyrri lífit; mátti hón þó ekki mót standa þvílíku ofrefli, sem við var at eiga. Váru þá fallnar af henni tíu þúsundir. Hón kallar þá á Hlöd, ok mælti: „kom þú til einvígis við mik, Hlöd, ef þú hefir öruggt karlmanns hjarta.” Hlöd svarar: „ekki em ek þyrstr í líf þitt, systir;” hét hann þá á sína menn, at taka hana höndum: „ok skal hón bíða fyrst á váru valdi.” Pagar Hervör heyrði þetta, eyrði hón öngu, ok drap allt hvat fyrri varð, gekk svá lengi; sótti þá at henni herrinn, en hón drap alla, er henni váru næstir, þangat til hón féll dauð niðr af hestinum; runnu þá blóðstraumar miklir af muuni hennar, ok meintu allir, hón mundi hafa sprungit af mæði; þóttisk engi hafa spurn af, at nökkurr kvennmaðr hefði svá hreystiliga barizk. Síðan lét Hlöd heygja hana með mikilli virðingu.

---







